


MUNTU YA BOLOKO

 . . . awa dyaka, na Nkumbu ya Mfumu Yesu, mpe na kuwa bisalu ya nene mpe ya lulendo yina Nge salaka, ntete. Mpe na ntangu yayi beto kele na kuingila, zangula lukwikilu ya beto mpe pakula beto, na kukwikila ti yina me lombama na nkokila yayi ke pesama. Nge zaba mosi na mosi na kati ya bawu, nyonso yina ba me lomba. Mpe beto ke sambila samu na bawu, na kulutula, Mfumu, bayina me kuma pene-pene na lufwa. Nata ngemba na mwela ya bawu kana yawu kele ntete kuna ve. Nata lunyakusu na nzutu ya bawu. Pesa yawu, Mfumu.

² Sakumuna kuvukana ya beto. Beto—beto ke lomba, Mfumu, na lukutakanu ya lusambulu ya Kilumbu yayi ya tatu na nkokila, ti, mutindu beto me vukana, na kuzabaka ti kisika yina zole to ya kulutula me vukana, Nge ke vwanda na beto. Mpe beto ke lomba na Nge, Mfumu, na kupesa beto Ndinga ya Nge na nkokila yayi. Zonzila beto, Mfumu, mpe pelisa bantima ya beto, na mutindu mosi ya ngitukulu, ti beto zaba wapi mutindu beto ke sungama beto mosi samu na ntangu ya nene yina ke na kukwiza, na yina beto me kwikila ti beto ke na kufinamaka na Kwizulu ya Mfumu.

³ Beto me tonda Nge samu na yina bantu me banda na ntangu yayi kuzwa lukwikilu yina kele kima ya ntalu samu na bawu, mpe ke na kubakula yinki lukwikilu kele. Mpe kuzaba, kutonda Nge samu na balukutakanu yina ke na kukwiza, na kukwikilaka ti Nge ke sala kima mosi. Mfumu, beto ke na kuingila na nswalu nyonso, mutindu bilumbu ya ntama, na kukwikilaka ti ntangu me finama yina Nge ke fungula banela ya Dizulu mpe ke kulumusa bansilulu yina Nzambi silaka samu na kilumbu yayi ya nsuka.

⁴ Ntangu yayi beto ke lomba na Nge, Mfumu, na—na kuvwanda na konso muntu, na bayinsi nyonso, mutindu beto me kuwa bubu yayi ti bantu mingi, na bisika nyonso, ke na nsatu. Pesa bawu mvutu na bandombolo ya bawu, Mfumu. Mpe beto ke na kulomba na kutala diboko ya nene ya Nzambi na kutambula na yinza nyonso na kati-kati ya bayina ke na kusosa kima ya nene yayi.

⁵ Lemvokila beto disumu ya beto. Sungika beto, Mfumu, na Mpeve ya Nge mpe na Ndinga ya Nge, samu ti beto kusungama beto mosi, na kuvwanda bisadi ya kutumama, bisadi yina ke tumamaka na luzolo ya Nzambi. Bika beto bambuka moyo, mpe kumeka kubanza na kati ya bantima ya beto, yinki Baklisto ya ntete salaka. Wapi mutindu ya bantu beto zolaka kukutana na ntangu beto zolaka kukutana na bayina talanaka na Nge bawu mosi. Wapi mutindu bizizi ya bawu lendaka lezima na lukwikilu mpe na kyese. Wapi mutindu baluzingu ya bawu lendaka vwanda

Ndinga ya moyo ya Nzambi, kaka “mikanda ya kusonama yina bantu nyonso vwandaka tanga,” na yina ba vwandaka tambula na kati-kati ya bantu. Nzambi, pesa dyaka yawu mbala mosi.

⁶ Bikwa baluzingu ya beto kutumama nyonso na Nge, na mutindu ti Mpeve-Santu ke zinga Yandi mosi na nzila ya beto, mpe kuzonza na nzila ya beto, Mfumu. Bikwa beto bambuka moyo, na kati ya mabanza ya beto, na yina beto ke na kutambula na nzila mpe na kati-kati ya bantu ya yinza, ti beto fwana kuvwanda ve mutindu bawu. Mpe beto ke kwenda na lweka mpe kubikila bawu kisika, Mfumu, na kisika ya bawu ya kulunga awa na ntoto. Beto ke baka kisika ya manima, na kuzabaka ti beto kele bimonikisi ya yinsi ya nkaka. Beto kele na Kimfumu yina ke na kukwiza na lulendo, Mfumu. Mpe Ntinu ya beto ya nene kele na kwizaka na mwa ntangu fyoti mpe ke yala na zulu ya bimfumu nyonso yina kele na kati ya kimfumu ya Yandi. Mpe Yandi ke twadisa mpe ke yala; na Yandi awa na zulu ya ntoto, difunda mosi ya bamvula, mpe kuvwanda na Yandi ntangu nyonso.

⁷ Na yayi na kati ya dibanza, Mfumu, na ntangu yayi beto ke na kuingila mvutu ya lusambu ya beto. Beto kele na kusala kivuvu samu beto me fungula masumu ya beto. Kana beto me sala kima mosi, kutuba dyambu mosi, to kubanza kima mosi, yina vwandaka ya kuswasana na luzolo ya Nge ya nene, bikwa Menga ya Yesu Klisto kusukula beto.

⁸ Twadisa beto, Mfumu, mutindu mpangi ya kento me tubila yawu na nkokila yayi, na yina me tadila yandi na bakala ya yandi na nzila ya Chicago. Twadisa bawu, Mfumu Nzambi, na kisika yina Nge lenda kusadila bawu, ti ba vwanda minzenzi ya nsemu samu na ba ya nkaka yina ke na kusosa nzila na kati ya mpimpa, bayina zaba ve Mfumu ya beto Yesu. Ntangu yayi beto ke pesa kimalu na Nge, mpe kuwa Ndinga ya Nge yina ke sungika, ti beto lenda kuzaba wapi mutindu ya kukubama samu na kilokolo ya nene yayi, na Nkumbu ya Yesu beto me lomba yawu. Amen.

[Kisika ya mpamba na bande. Mpangi Neville ke na kuzonzaka—Mu.]

Mfumu kusakumuna nge. Matondo, mpangi.

⁹ Mu kubikaka yayi ve. Mu, ntangu mu vwandaka kuna na yinzo, mu vwandaka ve na dibanza ti mu zolaka kwenda kisika mosi, na nswalu, mu lendaka kuzwa ngemba ve, na kuvwandaka na yinzo mpe kukwiza ve na lukutakanu ya lusambulu. Mpe mu me kota kaka mbala mosi, na nswalu nyonso, munu mosi, mpe dikanda ya munu zabaka ve. Kaka yina mu kotaka, mpe mbala mosi mu me basika dyaka. Mpe kuna mu me tuba, “Mu ke na kwenda na lukutakanu ya lusambulu.” Mpe kento ya munu kuzwaka ve ntangu ya kukubama samu na kukwiza, kuna yandi zabaka ve ti mu vwandaka kwiza.

¹⁰ Mpe mu kele na kyese na kuwa kimbangi ya mpangi ya kento yina, mpangi ya bakala, na yina me tadila Nsemu yina kuna na

Caroline ya Sude to na Caroline ya Node, kisika mosi kuna. Na Greenville, ya vwandaka? [Mpangi mosi ya kento me tuba, “Ve. Na Southern Pines.”—Mu.] Na Southern Pines. Ee.

¹¹ Mpangi Lee Vayle vwandaka kaka awa bubu yayi. Mu me botika yandi, bubu yayi, na yina beto vwandaka botika bantu awa bubu yayi. Mpangi Lee Vayle, nge zaba, mosi na kati ya bisadi kuna, Mpangi Parker Thomas. Ya vwandaka. . .

¹² Mu me bambuka moyo na—na ntangu, mpangi ya kento mosi yina kivudi kufukaka. Ya vwandaka ya kieleka, mpangi ya kento, na yina. . . Mpeve-Santu ntangu ya nkaka ke bikaka beto kukwenda na ntuala mpe ke teza lukwikilu ya beto, samu na kutala yinki. . . mpe ke teza mpe lukwikilu ya bantu ya nkaka. Ntangu beno ke na tala mbala mosi na kima, mpe beno ke mona kima mosi, mpe beno ke tuba yawu; ba ya nkaka ke tala mpe ke mona yawu ve, ba ke tuba ti kima kele ve. Beno me mona? Kasi yawu kele kuna.

¹³ Ntangu yayi, muntu ya nkaka ve lendaka kumona Nsemo yina vwandaka na zulu ya Paul, kasi Yawu vwandaka kuna. Ata muntu ya nkaka ve monaka yembe yina katukaka na Zulu, na kati ya Nsemo yina, na kifwani mosi, mpe kwizaka na zulu ya Yesu, kasi kaka yandi mosi Jean. Kasi Yawu vwandaka kuna. Beno me mona?

¹⁴ Mpe, kuna, na bilumbu landaka ntangu mu vwandaka tubila bantu samu na yina me tadila Nsemo yayi yina vwandaka mutindu Dikunzi ya Tiya, muntu ve kwikilaka yawu. Kasi na ntangu yayi kamera me talisa Yawu.

Tala mutindu mpeve ya yimbi kele ndombe.

¹⁵ Yawu kele kaka mutindu mosi na baluzingu ya beto, beto kele binsinsya. Mpe beto kele yawu, kana beto kele nsemo, beto kele yawu, kana baluzingu ya beto vwanda kintwadi na Nsemo ya kilumbu, beto ke tambula na kati ya Nsemo.

¹⁶ Yawu kele kaka mutindu mosi beno ke na kutalaka na nganda mpe kutuba, “Mu ke na kutala mwini,” ya kilumbu yayi. Beno—beno ke na kutala kivudi ya mwini. Yawu kele kifwani ya mwini. Yina kele ve, yawu mosi mwini, kasi yawu ke na kutalisa ti mwini kele. Yina ke na kutalisa ti mwini kele.

¹⁷ Mpe ntangu mu ke na kutalaka, na yina beno kele ya kuvwanda na nganda kuna, na kusalaka mupepe, kusololaka, yina zola tuba ti beno kele moyo, kasi yawu kele kaka kifwani ya luzingu.

¹⁸ Samu ti, konso kima fwana vwanda na mpimpa na kati ya yawu, samu na kubasisa kivudi mosi. Beno me mona? Samu ti, kivudi fwana kuzwa mpimpa mingi mpe nsemo mingi, samu na kubasisa kivudi. Mpe yawu lendaka vwanda nyonso mpimpa ve, mpe yawu lendaka vwanda nyonso nsemo ve. Kana yawu kele mpimpa, yawu kele mpimpa ya kieleka. Kana yawu kele nsemo,

kuna kivudi kele ve, kima kele ve samu na kusala kivudi. Kasi kana yawu kele ya kuvukana na mpimpa mpe nsemo, yawu ke pesa kivudi.

¹⁹ Na yina beto kele ya kieleka bivudi ya nsemo. Ntangu yayi beno ke na kutalisaka luzingu me katuka kisika mosi. Kana nge kele, mpe Muklisto, yayi kele kaka kivudi, yina ke na kutalisa kaka ti ya kele na Luzingu kisika yina nge lenda kufwa ve, samu ti luzingu yayi kele na lufwa na kati ya yawu. Beno me mona? Kasi yawu kele kivudi, samu ti beno kele moyo, kivangu yina lenda kutambula mpe yina kele na balenda ya kutala, ya kubanza, ya kukwenda kisika nyonso, mpe kuzonza, mpe na bambakusulu tanu ya nzutu. Kasi ata mutindu yina beno zaba ti, nyonso yina, ke kufwa. Mpe matata kele mingi. Beno zaba, yawu lenda vwanda kaka . . . Yawu kele kifwani, mona, yina ke talisa ti luzingu na lufwa ke ya kuvukana kisika mosi.

²⁰ Nzutu ya nsuni fwana kufwa. Kasi kana beno kele na kutalisaka, na luzingu ya beno yina ke kufwa, Nsemo ya Zulu, kuna beno ke na kumonikisaka Luzingu ya Kukonda nsuka, Nzambi. Mpe ntangu beno ke kufwa, beno lenda kaka kukwenda na Nsemo yina, samu ti Yawu kele yina beno monikisaka.

²¹ Kana beno kele bantu ya yinza ya mpimpa, beno ke monikisa yawu, mpe beno lenda kwenda kisika ya nkaka ve, kana kaka na mpimpa. Beno me mona? Mutindu yina beno kele na kati ya kifwani. Kuna, beto ke na kumonaka yawu na kieleka nyonso mutindu Mpeve-Santu ke monikisaka Nsemo mpe Luzingu, mutindu mosi lufwa ke monikisaka mpimpa.

²² Mpe bawu nyonso zole bawu yayi. Mbas- . . . Na nsuka ya sabala, keba ve na Lumingu, beto ke kumisa nene foto yina ya fyoti, mpe kutula yawu na dibaya.

²³ Kisika yina, beno ke tulaka foto *ya beno* kuna na dibaya. Mu zaba ve kana beno talaka yawu, to ve. Mpe kuna . . .

Mpe yawu me kuma keba ve lumingu mosi, na—na Jamaïque, kisika mu kwendaka na kulonga . . . Beto fidisaka babande bisika nyonso na yinza. Mpe *Mansweki Sambwadi* me kota kuna na kati . . . kuna na kati ya Jamaïque, ntama kuna. Mpe kuna bantu kele ntete na luzingu ya ntangu ya nkulu, kuna na manima ya mongo ya Blue Mountain. Mpe bantangu ya nkaka, bantu ya kuna, bawu ke na magnetophone yina beto pesaka bawu, yina beno fwana, mutindu Victrola ya nkulu, beno ke balula yawu na manivelle, mpe kuna kubika—kubika yawu kutambula mutindu yina. Mpe, na manima ya mwa muniti, muntu fwana kubalula dyaka yawu.

²⁴ Nkonga ya bantu yina vwandaka na mwa . . . mwa batterie, batterie ya bavolt sambanu, to kima ya nkaka, yina ke salaka magnetophone kusika. Mpe bawu—bawu vwandaka ya kuvwanda kisika mosi, keba ve lutangu yina kele awa na nkokila yayi, na kukuwaka *Mansweki* yina, mu banza ti ya vwandaka

yawu. Mpe na ntangu mu vwanda zonza, bawu talaka, na kukotaka na kati ya kivinga, Dikunzi ya ngo ya Tiya, kwizaka kisika yina vwandaka magnetophone mpe me tentama na zulu ya yawu. Mpe bawu kwendaka mpe bakaka kamera mpe bakaka Yawu foto. Mpe yawu kele kaka mutindu Mosi, Yawu yayi, ya kulelama kaka kuna na zulu ya yawu. Ntangu yayi beto ke kumisa yawu nene, samu ti beto kutula yawu na dibaya kuna na nganda, samu beno kutalaka yawu.

²⁵ Beto ke na kutonda mingi Nzambi samu na bumbote ya yandi yina me kumina beto. . . beto na Ntwala ya Yandi na kilumbu yayi. Awa beto ke na luzabu samu na bima mingi.

²⁶ Ntangu yayi mu banza ti mu ke tala awa kana mu lenda kuzwa mwa, mwa banoti to mwa, kima ya nkaka yina mu zonzilaka. To, beto ke baka kima mutindu. . . Mu ke na mwa malongi mu notikaka awa, kasi awa, na kati ya dibuku. Kana mu lenda kuzwa mosi, keba ve Mfumu lendaka pesa munu kima ya kutubila landila yawu, na yina beto ke sambila.

Ntangu yayi, beto me kubama samu na Lumingu.

²⁷ Mu vwandaka zonza na kati ya Bansangu. Mpe, na Lumingu, mu simbaka beno awa bangunga mingi, na dilongi yayi, “Samu na yinki nge ke boka na sika ya Munu? Zonza na nkonga mpe kwenda na ntwala.”

²⁸ Ntangu yayi, na Lumingu beto ke sambila samu na bambevo. Ntangu yayi, kana beno ke kwenda na kisika ya mbevo, mpe ya kele na kima ke salaka ti mbevo, ntangu beto ke sambidila bawu, kana bawu me beluka ve. Mpe mu zola, kana ya kele luzolo ya Mfumu, kaka na mwa dilongi ya kufi na suka ya Lumingu, mpe. Kuna, mu ke sambila bambevo, kusambila bantu nyonso. Mpe Billy Paul to bantu ya nkaka ke vwanda awa na suka ya Lumingu, keba ve na ngunga ya nana, na ngunga yina ba ke fungulaka dibuundu, samu na kupesa bakalte na bantu ntangu bawu ke kota, to wapi ntangu bawu ke kotila.

²⁹ Mpe na ntangu yayi, kuna, mu zola kumeka, mu banza ti Mfumu me kenzula munu mwa fyoti samu na yinki bantu ya nkaka ke belukaka ve. Mpe mu—mu banza ti ya kele kukondwa kubakula. Mpe mu—mu banza, keba ve, na Lumingu na suka, beto ke zonzila na yawu, kana Mfumu zola.

³⁰ Ntangu yayi, lukutakanu ya lusambulu ya Kilumbu ya tatu na nkokila ke vwandaka kaka mwa lukutakanu ya nkufi kisika beto ke kutanaka samu na kusambila, na yina beto ke, mpe beto ke vukanaka.

³¹ Bantangu ya nkaka, mu—mu banza ti kima ya kulutila yina mu me tala na kilumbu yayi, kele kukondwa kieleka na yina beto ke kwilaka. Beno me mona? Beno me mona? Kana Nzambi, na bilumbi ya John Wesley, lendaka sala na kilumbu yina yina Yandi me sala bubu yayi, yinki yawu zolaka sala; na bilumbu ya Martin Luther, to na bantangu ya nkaka? Mutindu beto ke

na kutsalaka Yandi na kusala, nyonso zole kele na kumonikisa na nzila ya Dibuuundu, na nzila ya Mpeve, mpe na nzila ya banganga mayela, mpe na nzila ya konso divanga, yawu ke—yawu ke—yawu ke na kusala beto fwana kundima yawu. Mpe Ndinga ya Nzambi awa me zonza Yawu mpe zabisaka Yawu tekila Yawu kuma. Mpe yawu kele na kukwendaka na ntwala, mpe kubikulaka, mpe kulungisaka kima ya kieleka yina Yandi tubaka, ti yawu ke kuma na mutindu mosi ya kulunga, ya kieleka mutindu Yandi tubilaka. Kasi beto ke na kuvwandaka ya beto mutindu bantu ya bubolo, mutindu bayina me yituka. “Mbote, mu ke na kuyufulaka kana yawu me tadila munu mosi? Mu ke na kuyufulaka kana yawu me tadila kaka dibuundu, yawu nyonso? To—to, mu ke na kuyufulaka kana ya kieleka Yawu me tadila kaka munu?” Mu banza, na Lumingu na suka, mu ke meka na kuzonzila na yina me tadila mwa misiku yina lenda kukyenzula beto fyoti.

³² Ntangu yayi, na nkokila yayi, mu me kuzwa kima mosi, kaka awa, ntete mu kwiza awa. Mu banzaka, “Kana Mpangi Neville, na ntangu mu ke kuma kuna, yandi kutuba, “Telema mpe longa,’ mpe na manima yandi vwanda ya yandi?” Beno me mona? Mu banzaka, “Mu fwana notika mwa Masonukwa.” Samu ti, mu zaba, yandi, yandi kele mpangi mosi ya mbote mingi, mpe beto—beto ke zolaka yandi.

³³ Ntete beto sambila samu na Ndinga, mu zola kupesa mbote na mpangi mosi. Mu lenda ve kutanguna nkumbu ya yandi na ntangu yayi, ya bawu nyonso zole. Bawu kele awa, bankundi ya munu. Ba . . . Bawu kele bisadi mpe milongi, bawu ke kwendaka na yinza, na kulonga. Bawu kuwaka Bansangu yayi na nzila ya kasete. Mpe bawu me basika na kati ya mabuundu ya badenomination, bankundi nyonso zole. Mpe ditoko mosi na kati ya bawu, yina lutilaka kuzola yawu, bakaka pepo, tii na Tucson, kaka malu-malu yayi, na nsuka ya lukutakanu. Mu banza ti mu vwandaka Kudya na Bantu ya Mumbungu. Mpe mwa nkundi, nkundi mosi ya mbote, me kwiza kuna. Mpe yandi kele . . .

³⁴ Bawu kele bantu ya Kansas. Mpe bawu me katuka ntama tii awa samu mu kwelisa bawu. Mu me zola yawu. Na kubanzaka ti bantu kele na lukwikilu mingi na bisambu ya beno, na kukwikila ti, Nzambi ke kuwa mpe ke pesa mvutu; matoko ke na kubandaka luzingu, mutindu yayi. Mpe ntangu bawu kumaka awa mazono, samu mu kwelisa bawu, bawu me zaba ti misiku ya luyalu ya yinsi ya Indiana ke na kulomba, ata ti ba kele na mukanda ke lakisa menga ya bawu, bawu fwana kuvingila awa na kati ya yinsi, bilumbu tatu, tekila ba kwelisa bawu. Na yina, ba lenda ve kukwelisa bawu tii na Kilumbu ya tanu na suka.

³⁵ Mpe mu ke lomba mpangi ya beto yina kele na manima kuna, kana yandi lenda kaka kutelama mpe kuzabisa beto nani yandi kele, mpe na kento ya yandi ya luzolo yina kele kuna, mpe na mpangi yina ke na kulandaka yandi.

³⁶ [Mpangi me tuba, “Matondo, Mpangi Branham. Ya kele luve na kuvwanda awa. Mpe mu kele Mpangi Roger O’Neil, yina ke vwandaka na Kansas, ke zyetaka na yinza na kulongaka, mutindu mulongi, na kulongaka, ‘Yesu ke kuulaka, ke belusaka, na nzila ya lukwikilu na Yesu. . . ? . . .’ Ntangu nyonso mu ke kangaka bifunda. . . ? . . . Yayi kele kento yina mu pesaka nsilulu ya makwela, Patricia Brown. Ba ke kwelisa beto, na Kilumbu ya tanu. Yandi yayi ke salaka kintwadi na munu mpe mpangi, Mpangi Ronnie Hunt, yina kele kuna na manima. Mpe yandi yayi kele kento ya yandi yina yandi pesaka nsilulu ya makwela, Carol. . . ? . . . Mpe beto ke na kyese na kuvwanda awa na nkokila yayi.”—Mu.]

³⁷ Matondo mingi, na nge. Beto zola na kieleka nyonso ti bimonikisi yayi kele ntete matoko, samu na kisalu ya Mfumu Yesu, ti balusakumunu ya Nzambi, kutambula na bawu na nzila. Mpe mutindu mu ke na kuyufula, na kuingilaka Kwizulu ya Mfumu, mpe na kutala matoko ya babakala mpe matoko ya bakento na dibanza na kati ya ntima, samu na kusadila Klisto, yina ke na kuyangidisa munu, mona, na kutala bawu ya kutelama mutindu yayi. Bika Mfumu kusakumuna beno, mingi, mpangi ya munu ya bakala, mpe mpangi ya kento.

³⁸ Bika na ntangu yayi beto tanga na mwa Buku yina nabunu mu longa, na luzingu ya munu. Mpe ya ke ya kieleka. . . Kaka kapu mosi, Buku ya Philemon. Mpe ya ke. . .

³⁹ Mu kele mwa ndambu Irlandais, mpe mu—mpe mu ke na singa ya kisengo na dinu ya munu ya yisi, samu na kusikimisa meno ya nkaka na kisika ya yawu. Mu, mu, bantangu ya nkaka mu ke tangunaka mbote ve bankumbu yayi, kasi mu zaba kwandi yinki ya kele. Mpe ntangu ya nkaka mu ke lendaka ve kutanguna yawu mutindu ya kulunga, samu mu kotaka ve lukolo ya yinda. Na yina, “Philemon,” muntu mosi kuna na manima me tuba, mu banza ti yina kele mutindu ya mbote ya kutanguna yawu.

⁴⁰ Ntangu yayi, na nzila ya 1, mu zola kubaka mpova mosi to zole na kati ya yayi.

Paul, muntu ya boloko ya Yesu Klisto, . . .

⁴¹ Mpe yawu kele yina mu zola kubaka na nkokila yayi, mutindu dilongi, kana Mfumu zola, ya kele: *Muntu Ya Boloko*.

⁴² Ntangu yayi, ya ke vwanda mpasi mingi samu na beno na kubanza ti muntu mutindu Paul lendaka kubaka yandi mosi nkumbu muntu ya boloko. Yandi muntu butukaka ya kimpwaza, ya kifuluka na Mpeve-Santu, kasi ata mutindu yina yandi me baka nkumbu “muntu ya boloko.”

⁴³ Mpe ntangu yayi beto me bakula, ntangu yandi vwandaka zonza na bantu ya Corinthe, “Paul, ntumwa ya Yesu Klisto.” Na kisika ya nkaka, “Paul, kisadi ya Yesu Klisto landila luzolo ya Nzambi,” ntangu yandi vwandaka zonza na Timothée, yawu vwandaka ya kuswasana na ba ya nkaka. Ntangu yayi na yina

yandi vwandaka sonika awa na Philemon, yandi tubaka, “Paul, muntu ya boloko ya Yesu Klisto.” “Paul, ntumwa,” mu zola kulonga na yawu nkokila mosi. “Paul, kisadi,” kulonga na zulu ya yawu. Mpe, “Paul, muntu ya boloko.”

⁴⁴ Kasi, na nkokila yayi, samu ti yawu ke baka bangunga mingi na kutala mbote mbote mosi na kati ya malongi yayi, mu ke zola kubaka, na nkokila yayi, “Paul, muntu ya boloko,” mpe kubaka kilesa: *Muntu Ya Boloko*.

Ntangu yayi beto yinika bayintu ya beto mwa muniti fyoti.

⁴⁵ Mfumu Yesu, konso muntu, yina kele na lenda na nzutu, lenda balula mikanda ya Biblia yayi, kasi kaka Mpeve-Santu lenda kubangula Yawu samu na kuzabisa yinki yawu zola kutuba. Beto ke lomba Yandi na kukwiza na ntangu yayi mpe kusadisa beto na kubakula yinki yayi vwandaka, tuba, profete yayi ya nene, ya lulendo, Paul, mpe yandi kukibokilaka “muntu ya boloko.” Bika Mpeve-Santu kuzabisa beto yawu na mutindu beto ke na kuvingilaka na Yandi, na Nkumbu ya Yesu Klisto. Amen.

⁴⁶ Ntangu yayi mu lenda banza, Paul, ntangu yandi sonikaka mukanda yayi na Philemon, mutindu yandi vwandaka ya kuvwanda na kati ya boloko, kuna na kati ya boloko ya mbanza yina, muntu ya boloko. Mpe yandi lendaka visa mbote, landila kisika yina yandi vwandaka nsasa ya mpova yayi. Yandi vwandaka ya kuzunga na—na—na bisengo. Yandi lendaka kuzwa kimpwanza kana kaka ti muntu basisa yandi. Mpe yandi zabaka yinki ya kele na kuvwanda muntu ya boloko. Mpe kisika, ya nkaka, mu banza ti ntumwa zolaka kaka kutuba mwa . . . yandi tubaka yawu ve samu na bampasi yina vwandaka na yandi, na yina yandi vwandaka muntu ya boloko na—na nzutu ya yandi ya kuvwanda kuna na—na boloko yina. Kasi mu banza ti yandi vwandaka zonzila na yandi—na yandi mosi, na mpeve ya yandi—ya yandi—ya yandi mosi, luzolo ya yandi, na kuvwandaka muntu ya boloko ya Yesu Klisto.

⁴⁷ Ntangu yayi, beto nyonso butukaka, na kimpwanza, ya kubaka lukanu yina beto zola. Nzambi mpe ke salaka yawu. Samu ti, Yandi fwana kutula konso muntu na ntuala ya lufulu ya mutindu mosi, to Yandi ke tula muntu ya yimbi na zulu. . . Yandi ke tula muntu ya ntete na lufulu ya yimbi, yina Yandi ke tula na ntuala ya kimpwaza ya kusola. Beno me mona? Beto kele na nkokila yayi, kaka, mutindu vwandaka Adam na Eve. Luswaswanu kele ve. Mbote na yimbi kele na ntuala ya konso muntu. Beto lenda sola, luzingu to lufwa; yina me tala beno, na kusala yawu. Beno me mona?

⁴⁸ Ya kele mutindu yina salaka Adam na Eve, mpe, mona, mpe—mpe bawu salaka nsololo ya yimbi. Mpe ntangu yayi, samu na yina, bawu me kotisa bantu nyonso, ya ntoto, na kati ya lufwa, kitumbu ya lufwa.

49 Mpe kuna Nzambi kwizaka na kifwani ya muntu mpe bakaka lufwa yina, mpe futaka ntalu ya lufwa, ti . . . Bantu ya Yandi yina zolaka ku—kuvwanda na kimpwanza lendaka kuzwa kimpwanza.

50 Ntangu yayi, kana Yandi bakaka beto, kusala ve mutindu Yandi salaka Adam na Eve, kubasisa beto kaka mbala mosi na kima mosi, tubaka, “Mu ke vuukisa beno ata beno zola to ve,” kuna Yandi tulaka Adam na Eve na—na zulu ya lufulu ya yimbi, beno me mona. Kasi konso muntu fwana kusola, na kilumbu yayi, na kati-kati ya lufwa mpe luzingu. Beto lendaka sala yawu.

51 Kaka mutindu mu me zonzila yawu, kana nsemo ya nge lendaka monikisa, luzingu ya nge ke lakisa mbote wapi lweka nge kele. Ata wapi lweka nge lenda kutuba ti nge kele. Yina nge ke na kusalaka, konso kilumbu, ke monikisa nani nge kele. Beno kuwaka kingana yayi, “Luzingu ya nge me lutila kuboka na mutindu ti, mu lenda kuwa ve kimbangi ya nge.” Beno me mona? Bisalu ya nge—ya nge ke na kubokaka ngolo mingi.

52 Mu ke kwikilaka ntangu nyonso na kuboka mpe kudumuka. Kasi mu ke tubaka ntangu nyonso, “Kupamuka ve kulutula luzingu ya nge, samu ti yinza ke na kutalaka yawu.” Beno me mona? Beno fwana kudumuka kaka mutindu mosi na luzingu ya beno, na yina, samu ti muntu ke na kutalaka beno. Mpe na ntangu yayi. . .

53 Bantu zola dyaka ve kukwiza na dibuundu. Bawu—bawu, mingi na kati ya bawu, zola kwandi kukwenda ve. Mpe mingi na kati ya bawu, yina ke kwizaka ve, kele bantu ya kusungama. Bawu me mona mavwanga mingi na kati ya dibuundu, na yina ba ke dyaka ve na kima ya kusala na yawu. Mpe mbala mingi, beto ke zonzilaka na yawu, beno lenda kwandi ve kubedisa bawu, mona, ya kele samu na—na mutindu bantu ke zingaka. Bawu me bakaka nkumbu ya Muklisto. Bawu kele ditadi ya nene yina ke bwisa bantu yina yinza kele na yawu, ya kele bakala to kento yina ke tuba ti yandi kele Muklisto, kasi yina ke na kuzinga mutindu mosi ve na kimbangi ya yandi. Ya kele nyonso ya kieleka.

54 Ntangu yayi, na yina me tadila kuyituka yina ke vwanda na kilumbu ya Lufundusu. Ntangu yayi, musumuki, kitekisi malafu na mayuya, yina ke bulaka nsaka ya mbongo, muntu ya kinsuza, yandi—yandi ke yituka ve na kukuwa kitumbu yina ba ke tangila yandi, “Kwenda na tiya ya kukonda nsuka.” Yandi ke yituka ve. Kasi muntu yina ke mekaka kubumbama na manima ya mwa dibuundu mosi, ya kele kisadi yina ke yituka na Kilumbu ya Lufundusu. Beno me mona? Yina ke zonzaka ti yandi kele Muklisto, mpe ke na kuzinga mutindu ya nkaka. Yawu vwandaka kwandi mbote na yandi na kuzonza mutindu yina ve, to na kubanda kwadi, kasi kubanda mpe kuzinga mutindu ya kuswasana. Samu ti, yandi kele ditadi yina ke bwisa bantu ya

kulutila nene yina kele na beto, ya kele yandi yina ke na kutuba ti yandi—yandi—yandi kele Muklisto, kasi ke zinga mutindu ya kuswasana.

⁵⁵ Ntangu nyonso, beno fwanikisa ve luzingu ya beno samu na lulendo yina kele na beno na kusala bimangu. Beto mosi mpe beto fwanikisa ve luzingu ya beto na luzabu yina kele na beto na Ndinga. Kasi beno fwanikisa luzingu ya beno ya ntangu nyonso, na kutalaka na manima mpe kuzaba wapi mutindu ya mbuma ke na nataka luzingu yina beno ke na kuzinga ntangu yayi. Beno me mona?

⁵⁶ Mutindu mu longaka yawu na bilumbu me luta, na lukutakanu ya bantu ya mumbungu na Phoenix, na Arizona, na yina me tadila kifwani ya Yesu, na kumonikisaka Luzingu ya Muklisto. Mu vwandaka tuba mu butukaka awa na Kentucky, sika wapi ya ke na mambu ya nkulu, na kutulila na ntangu yina mu vwandaka mwana ya fyoti. Mpe mwana ya bakala ya ngo vwandaka ve na yinzo mutindu yina kele na beto awa, kisika beto vwandaka na bakento mingi ya kitoko bayina vwandaka kutala bitala-tala, kisika nyonso na yinzo, samu na kubongisa bansuki ya bawu, mpe nyonso ya nkaka. Kasi yandi vwandaka na mwa kitala-tala ya fyoti, kaka mwa kitini ba tulaka na zulu ya yinti kuna na nganda, kisika yina vwandaka dibaya samu na kuyobila, kisika yina mama na tata ya yandi vwandaka yobila, mpe bawu vwandaka kusana bansuki ya bawu, mpe nyonso ya nkaka, na kutalaka na kitini ya kitala-tala ya nkulu kuna na zulu ya yinti.

⁵⁷ Na kieleka, ya kele mutindu ya yinzo yina vwandaka na beto. Kana muntu zolaka kutala kitala-tala, samu na beto bana, ya bongaka ti beto baka kesi mpe kuyuluka na dibaya yina ba ke yobilaka, mpe kutala na kitini ya—ya kitala-tala yina mu lokotaka, munu mosi, na dizala. Ya vwandaka ve kuna na Kentucky. Kasi ya vwandaka awa na Indiana, na Utica Pike.

⁵⁸ Ntangu yayi, mwana yayi kutalaka ntete ve yandi mosi mutindu yina. Kuna, yandi kwizaka na mbanza, samu na kutala nkooko ya yandi ya kento. Mpe na . . . Ya ke na ntangu yandi vwandaka tambula na kivinga, nkooko ya kento vwandaka na yinzo yina vwandaka na kitala-tala ya nene na mwelo. Mpe kuna, mwana ya bakala, na kukwendaka nswalu na kati ya kivinga, talaka mwana ya nkaka ya bakala na ntwala ya yandi. Mpe mwana ya bakala na kati ya kitala-tala mpe, vwandaka kwenda nswalu. Mpe yandi tubaka ti yandi fwana kutelema mwa bamuniti fyoti mpe kutala yinki mwana ya bakala yina ke sala. Mpe ntangu yandi telemaka, mwana ya bakala mpe kutelemaka. Ntangu yandi vwandaka balula yintu ya yandi, mwana ya bakala yina vwandaka balula mpe yintu ya yandi. Yandi kalataka yintu ya yandi, mwana ya bakala kalataka yintu ya yandi mpe. Na kumanisa, yandi me finama, samu na kutala mbote. Mpe yandi

me baluka. Mama ya yandi, na nkooko ya yandi, yitukaka na kutalaka yandi. Yandi me tuba, “Mama, ya ke, munu”

⁵⁹ Mu me tuba yawu, samu, “Beto, mpe, ke na talisaka kima mosi.” Beno me mona? Luzingu ya beto kele kifwani.

⁶⁰ Mpe na ntangu yayi, kana beto zingaka na bilumbu ya Noé, wapi lweka beto zolaka kusola? Wapi lweka beto zolaka kusola na kilumbu ya nene yina Noé zingaka? Wapi lweka beto zolaka kusola na bilumbu ya Moïse? Wapi lweka na bilumbu ya Elie, mbikudi, ntangu yina bantu nyonso vwandaka kuna na kati ya muvusu ya nene ya—ya kindele, mutindu Jezabele ya ntangu yayi, mpe yina nataka bisadi nyonso ya Mfumu na kati ya nsadulu ya yinza? Mpe dibuundu mpe banganga-Nzambi vwandaka fukama na ntwala ya yandi. Beno zolaka kusola na kuvwanda bantu ya kuzabana, to beno zolaka kuvwanda na Elie?

⁶¹ Ntangu yayi, na bilumbu ya Mfumu Yesu, kana beto lenda kubanza na Muntu yayi yina vwandaka ve ya kuzabana, yina longokaka ve na bantu ya yinza, bawu bakulaka ve wapi balukolo Yandi kotaka, mpe kotaka ve—ve seminaire. Mpe—mpe kulaka na nkumbu ya “mwana ya makangu.” Mpe basikaka, na kulongaka Nsangu mosi ya mbote yina vwandaka ya kuswasana na yina ba longisaka bawu. Ya kieleka . . . Mpe vwandaka fundisa bisadi mpe bimvuka ya bawu, mpe nyonso ya nkaka yina.

⁶² Mpe bimvuka zonzaka mutindu yayi, “Kana muntu meka kwenda kukuwa yina kuwa ti kele mbikudi, ba ke bingisa yandi na synagogue,” yina vwandaka disumu yina ke nata lufwa. Ba zolaka katula bawu na lutangu ya bawu. Lwaku kaka mosi samu na kusambila vwandaka na yisi ya menga ya mwana ya dimeme. Bawu zolaka kwiza na munkayulu yayi. Mpe—mpe kuna ba bingisaka bawu, mpe wapi dyambu ya nene ya vwandaka.

⁶³ Mpe Muntu yayi zabaka yina ve. Kasi na kieleka nyonso Yandi vwandaka na kati ya Masonukwa, kasi bawu zabilaka Yawu ve na mutindu yina. Wapi lweka beno zolaka baka? Beno me mona? Ntangu yayi, ku . . . Luzingu yina beno ke na kuzinga na ntangu yayi, ke na kumonikisa kaka na ntangu yayi yinki beno zolaka kusala kuna, samu ti beno kele ntete kaka na yisi ya lulendo ya mpeve yina. Beno me mona? Kana beno baka lweka yina na ntangu yayi, na bawu, beno zolaka kusola kwandi yawu kuna. Samu ti, mpeve yina ke na kati ya beno na ntangu yayi ya kele yina vwandaka na kati ya bawu kuna. Beno me mona?

⁶⁴ Ata mbala mosi dyabulu ke katula mpeve ya yandi; kana kaka ya ke katuka na kati ya muntu mpe kukota na muntu ya nkaka.

⁶⁵ Nzambi mpe, ata mbala mosi ke katulaka Mpeve ya Yandi; Ya ke katuka na muntu mpe na muntu ya nkaka. Beno me mona?

66 Kuna, Mpeve kaka mosi yina vwandaka na zulu ya Elie me kwiza na zulu ya Elisée, mutindu Mosi na zulu ya Jean le Baptiste, mpe nyonso ya nkaka.

67 Mpeve-Santu, yina vwandaka na zulu ya Klisto, me kwiza na zulu ya bilandi, mpe kulandila, mpe kaka na zulu ya bantu. Beno me mona? Ata mbala mosi ve Nzambi ke katulaka Mpeve ya Yandi.

Na yina, beto kele na kimpwaza ya kusola.

68 Mpe mu—mu ke na tala awa ve kisika Paul vwandaka nyonga, mpe yandi me nyonga ve samu ti yandi vwandaka muntu ya boloko. Kasi yandi vwandaka zonzila yawu samu na yandi mosi. . . Mu banza ti Paul, ntangu yandi sonikaka mukanda yayi na kisonokono yina, ya vwandaka Mpeve-Santu yina twadisaka yandi na kusonika yawu. Samu ti, ata, na nkokila yayi, beto lendaka kubaka dilongi na kulakisa, samu na yinki Paul salaka mutindu yayi. Samu ti, ya kele na kati ya Masonukwa, mpe yina ke na kati ya Masonukwa kele na Nsuka ve. Mu banza, ti, na yina yandi vwandaka ya kuvwanda na boloko ya mawa ya nkulu yayi, Paul sonikaka kuna na mpangi ya yandi, yina, vwandaka mpangi ya yandi, ti yandi vwandaka “muntu ya boloko ya Yesu Klisto.” Na yina, yandi lendaka kutuba yawu samu na bima yina vwandaka kuzunga yandi. Kuna, yandi vwandaka na boloko, kasi yandi vwandaka zonzila ve samu na yina, na kisadi yayi—yayi ya Klisto, mpangi ya yandi ya kusalu. Yandi tubaka ti yandi vwandaka muntu ya boloko samu na Ndinga ya Yesu Klisto, samu ti Klisto kele Ndinga.

69 Mpe Paul vwandaka muntu ya mayela mingi na bilumbu ya yandi. Yandi vwandaka na lukanu ya nene. Yandi vwandaka—yandi vwandaka muntu yina kuzwaka malongi na . . . na nzila ya bantu, na muntu mosi na nkumbu ya Gamaliel, yina vwandaka mulongisi ya nene ya kilumbu ya yandi, mosi na kati ya balukolo ya nene yina yandi lendaka kwenda. Mutindu, beto ke bokilaka, Wheaton, to Bob Jones, to lukolo mosi ya ba yina kele ya kukangama na bandongosolo ya nkulu. Ba longisaka yandi na kukuma mutindu—mutindu—mutindu kisadi ya Ndinga. Ba longisaka yandi mbote, mpe yandi vwandaka na mayela mingi, na lukanu ya nene samu na kukuma kilumbu mosi keba ve nganga-Nzambi mosi to nganga-Nzambi ya nkuluntu samu na bantu ya yandi.

70 Yandi vwandaka na lukanu. Mpe na kutala, ti, balukanu ya nene yayi yina yandi longokaka, mpe samu na yawu yandi pesaka luzingu ya yandi nyonso, keba ve katuka bamvula nana to kumi, na kutala tii na bamvula makumi tatu to makumi tatu na tanu, ntangu yandi manisaka lukolo ya nene mpe yandi kuzwaka diplôme ya yandi; mpe yandi kuzwaka ba-diplôme ya yandi nyonso, mpe yandi vwandaka kuwisana na milongi nyonso, mpe na nganga-Nzambi ya ntete na Jerusalem. Yandi pesaka

yandi bantumunu, bantumunu yandi mosi, yina ya sonikaka, mpe pesaka na Saul muntu ya nene yayi, “Na kukwenda na Damas samu na kusosa bawu nyonso yina vwandaka kuna mpe vwandaka sambila Nzambi mutindu mosi ve na yina yandi zabaka, mpe kukanga bawu mpe kutula bawu na boloko.” Kana ya lendaka kusalama, yandi kuzwaka bantumunu ya kufwa bawu, kana yandi zolaka. Yandi vwandaka . . . Yandi vwandaka na lukanu ya nene.

⁷¹ Mpe na ntangu yayi, nyonso yina ba longisaka yandi, Nzambi basisaka nyonso na kati ya yandi. Beno me mona? Mpe yinki yina vwandaka lukanu ya yandi, mpe wapi mutindu tata ya yandi basisaka mbongo, mpe balukanu ya tata mpe mama yandi, katukilaka yandi samu ti—ti Nzambi vwandaka na kima ya nkaka. Samu na yawu, yandi vwandaka muntu ya boloko yina dibanza ya luzingu ya yandi sobaka, mpe yandi kumaka muntu ya boloko ya Yesu Klisto, Yina vwandaka Ndinga.

⁷² Nzila ya Damas yina sobaka Paul. Ntangu yandi bakaka nzila, na ngunga keba ve kumi na mosi, ya vwandaka, na ntangu yina, ba losaka yandi na ntoto. Mpe yandi kuwaka Ndinga, tubaka, “Saul, samu na yinki nge ke na kutalisa Munu mpasi?” Mpe yandi talaka na zulu. Ntangu yandi talaka na zulu, yandi yina vwandaka Juif, yandi zabaka ti Dikunzi ya Tiya yina vwandaka Mfumu yina twadisaka bana ya Israël, samu ti yandi zabaka yinki Yawu vwandaka.

⁷³ Beno bambuka moyo, Hebreu yayi zolaka ve ata mbala mosi kubokila konso kima “Mfumu,” na bisono ya nene M-f-u-m-u, Elohim, kana kaka yandi kwikila ti ya vwandaka Yawu, samu ti ba longisaka yandi na kuvwanda muntu ya mayela mingi. Mpe ntangu yandi talaka na zulu, mpe yandi talaka Yayi, Nsemo, Dikunzi ya Tiya yina twadisaka bantu ya yandi na ntoto ya kuyuma, mpe yandi tubaka, “Mfumu,” Elohim, na bisono ya nene M-f-u. . . “Mfumu, Nani Nge kele?”

⁷⁴ Mpe wapi mutindu ya lendaka yitukisa muntu yayi ya theologie, na kuwa ti, “Mu kele Yesu,” Yandi Yina yandi vwandaka kunwanisa. Wapi mutindu—wapi mutindu mambu balukilaka yandi! Oh! Oh! Yina vwandaka kima mosi ya ngitukulu samu na bakala yayi, ti balukanu nyonso yina vwandaka na yandi, na kubakula, na mbala mosi ti, yina yandi vwandaka talisa mpasi. Balukanu ya yandi twadisaka yandi ntama na kima ya mfunu yina yandi zolaka sala. Mpe wapi disakuba ya nene yawu lendaka vwanda, na ntumwa yayi, ntangu Yandi tubaka, “Munu kele Yesu,” Yandi Yina yandi vwandaka talisa mpasi. “Samu na yinki nge ke na kutalisa Munu mpasi?”

⁷⁵ Mwa masonukwa ya nkaka beto lendaka kukotisa awa. Beno me mona, ntangu bantu ke sekaka Dibuundu, na kieleka bawu ke sekaka ve Dibuundu, kasi bawu ke sekaka Yesu. “Samu na

yinki nge ke na kutalisa Munu mpasi?” Wapi mutindu Paul, na mayela ya yandi nyonso, lendaka kundima ti Yayi vwandaka. . . ti Nkonga yayi yina yandi vwandaka talisa mpasi vwandaka Nzambi ya kieleka yina yandi banzaka kusadila? Mu banza ti, na kukota ve na mambu ya fyoti-fyoti, mu banza ti beto nyonso me zaba mbote yinki mu zola tuba awa. Kima mutindu mosi kele na kusalamaka bubu yayi.

⁷⁶ Paul, na kuzabaka ve, ata ti yandi vwandaka na mayela mingi, kulutila mayela na bantu yina ya Galilée yina kotaka ve lukolo, bayina yandi vwandaka kutalisa mpasi bawu yina na kati ya kukuluka ya bawu ndimaka Muntu yayi mutindu Mfumu. Kasi, Paul, na kati ya malongi ya nene ya yandi mpe mayela ya yandi, lendaka ve kundima Yawu. Mpe wapi mutindu mambu balukilaka yandi, na nzila yina. Mpe yandi kumaka mpofo, kuna yandi lendaka dyaka ve kulungisa kusalu ba pesaka yandi, kasi ba nataka yandi na kisika mosi na bala-bala yina ba ke bokilaka nkumbu la Droite, na yinzo ya muntu mosi.

⁷⁷ Mpe kuna mbikudi na nkumbu Ananias, kwizaka, yina monaka vision, yandi vwanda kwiza, yandi monaka kisika yina yandi vwandaka, yandi kwendaka na kisika yina yandi vwandaka, mpe kotaka. Mpe tubaka, “Mpangi Saul, Mfumu yina monikinaka na nge kuna na nzila; me fidisa munu, samu mu tula nge maboko, mpe nge mona dyaka mpe nge fuluka na Mpeve-Santu.”

⁷⁸ Beno mona kisika yandi kumaka. Wapi—wapi kima ya zolaka vwanda samu na Paul! Beno me mona? Nyonso yina ba longisaka yandi sobaka. Na yina na ntangu yayi, na—na mayela nyonso yina vwandaka na yandi, yawu—yawu kumaka kaka mpamba samu na yandi.

⁷⁹ Ntangu yayi, yandi zabaka ti yandi kuzwaka kimbangi mosi. Mpe awa kele dyaka na malongi ya mbote samu na beto, ti, kimbangi na yawu mosi me lunga ve. Ya lunga kuvwanda kimbangi yina kele mutindu mosi na Ndinga ya Mfumu. Mpe kuna, yandi na kumonaka yayi, zabaka ti Yawu vwandaka Kima mosi ya mfunu, yina, muntu ya nkaka kuzwaka Yawu ntekila yandi, yandi bakaka bamvula tatu na ngonda sambanu kuna na ntoto ya kuyuma na Arabie; na kubakaka Biblia, mutindu Yawu vwandaka na ntangu yina, Ngwisani ya Ntama, yandi kwendaka kuna, samu na—samu na kufwanikisa kimbangi yina yandi kuzwaka, mpe kumona kana Yawu vwandaka na kati ya Masonukwa.

⁸⁰ Ntangu yayi yinki ya zolaka sala kana yandi tubaka, “Mbote, mu banza ti yawu vwandaka kaka mwa kima me kubuka,” mpe kulanda nzila ya yandi? “Mu—mu ke sadila na mayela ya munu?”

⁸¹ Ntangu yayi, yandi zolaka kuma muntu ya boloko ya kima mosi, muntu ya boloko. Kasi na manima ya kufwanikisa yawu, mpe kumona yawu, ya kele ve ya ngitukulu ti yandi lendaka

kusonika Buku ya Ba-hebreux, mutindu kifwanukusu. Beno me mona? Bamvula tatu na ndambu kuna, na kutangaka Ndinga, mpe samu na kubakula ti Nzambi yina bokilaka yandi vwandaka vutula yandi, mpe samu na kukatula yandi mayela nyonso, mpe kusoba mayela ya yandi nyonso, nyonso yina ba longisaka yandi. Balukanu ya yandi nyonso, yawu katukilaka yandi, mpe yandi me kituka muntu mosi ya boloko. Luzolo ya Nzambi kumaka nene mingi, mpe na luzabu ya kulutila nene, ti yandi lenda katukila Yawu ve.

⁸² Yina kele kimbangi ya kieleka samu na konso mukwikidi ya kieleka yina me kutana na Nzambi. Beno—beno ke kota na ngwisani na Kima mosi yina kele nene mingi, ti beno. . . ti—ti beno ke kuma muntu ya boloko, ya kima ya nkaka. Beno me mona? Beno—beno ke bika nyonso, na kukuma muntu ya boloko ya Yayi.

⁸³ Yesu tubaka yawu mbala mosi, “Kimfumu ya Mazulu kele mutindu mosi na muntu yina sumbaka bapalata. Kasi ntangu yandi me kuzwa Palata ya kulutila ntalu, yandi ke tekisa nyonso yina kele na yandi, samu na kusumba Yina.”

⁸⁴ Mpe ya kele mutindu mosi awa. Beno—beno kele na dibanza ya kimuntu, beno ke na luzabu ya kimuntu; kasi ntangu ya ke kuma na kisika yina beno—beno—beno ke bakula Kima ya kieleka, beno—beno ke tekisa nyonso, mpe beno ke kangama na kati ya Yayi.

⁸⁵ Paul zabaka yinki yawu vwandaka. Yandi—yandi bakulaka ti yandi vwandaka ya kukangama na Kima mosi. Mutindu beto ke kangisaka mpunda, ya kele—ya kele samu na kubenda kima mosi. Mpe Paul zabaka, na manima ya kimbangi yayi, mpe bamvula tatu na ndambu yina yandi fwanikisaka kimbangi yina yandi kuzwaka, na Biblia, yandi bakulaka ti Nzambi soolaka yandi mpe vwandaka benda yandi na nzila ya Mpeve-Santu, kimbangi yina vwandaka na yandi, na kunata Nsangu ya mbote na Bantu ya Makanda. Mpeve, Yandi mosi, vwandaka benda yandi.

⁸⁶ Mpe, bubu yayi, na kuvwandaka bisadi ya Klisto, beto me kuma ya kukangama, ya kukangama. Beto lenda ve kukwenda kisika ya nkaka. Beto kele ya kukangama na kati ya Yawu, ya kukangama na Ndinga. Ata nyonso muntu ya nkaka ke tuba, beno kele ya kukangama na Yawu. Ya ke na kima na yina me tadila Yawu, ti beno lenda kukatukila Yawu ve. Beno kangamaka na kizitu Yina, na nzila ya Mpeve-Santu, yina me kangisa beno na kizitu na Ndinga. Ata nyonso muntu ya nkaka ke tuba, Ya kele Ndinga. Yawu ke kaka ya kukangamaka na Yawu, kukangama na kizitu mpe na Yawu. Na Ndinga, na nzila ya Mpeve, yandi vwandaka ya kukangama.

⁸⁷ Yandi longokaka kuna na manima ya ntoto ya kuyuma ya Arabie. Ntangu, bima nyonso ya yandi ya ntama, mpe bimbang, mpe lukanu ya yandi, nyonso yina, katukilaka yandi.

⁸⁸ Ntangu yayi, yina kele yina beto kele na kutala, bubu yayi, ti ntete, ba fwana kukatula beto nyonso ya beto. Mpe bantu zola ve ba katula bawu nyonso ya bawu. Mpangi Méthodiste ke zola kukangama na mwa malongi ya yandi ya Méthodiste. Uh-huh. Mpangi Baptiste ke zola kukangama na mwa malongi ya yandi ya Baptiste. Beno me mona? Kasi ba fwana kukatula beno nyonso, mpe kubutuka kaka, ya mona. Mpe na kubanda kuna, bika Mpeve-Santu twadisa. Beno lendaka ve kutuba, “Mbote, tata ya munu—ya munu, vwandaka tuba, ntangu yandi kuzwaka yawu, mpe kotaka na dibuundu, yandi pesaka pasteur mbote ya maboko. Yandi, yandi kele muntu ya mbote ya dibuundu.” Yina lendaka vwanda mbote mingi samu na dikanda ya yandi, kasi beto kele dikanda ya nkaka. Beno me mona? Ntangu yayi beto fwana kuvutuka na mbandu ya Biblia samu na kilumbu yayi.

⁸⁹ Banganga-Nzambi vwandaka mpe, ya kukangama. Kasi, beno mona, bawu kotaka na kilumbu yankaka, mpe bawu—bawu mangaka kukatula basinga ya bawu ya ntama samu na kuvwata singa ya malu-malu.

⁹⁰ Mpe beto ke na kutala mutindu mosi bubu yayi. Beto me basika na mbandu ya mabuundu, mutindu beto talaka yawu na bambandu ya dibuundu, Biblia, mpe nyonso ya nkaka, kasi ntangu yayi beto me kuma na mbandu mosi ya kimpwanza, kisika Mpeve-Santu Yandi mosi ke kulumuka mpe ke talana Yandi mosi, mpe ke lakisa nani Yandi mosi kele, samu na kulungisa konso nsilulu yina Yandi salaka. Oh, la la! Wapi ntangu ya nkembo!

⁹¹ Mpe yandi zabaka ti, kima ya nkaka, yandi zabaka ti yandi lendaka ve kukwenda na bisika ya nkaka, mpe, mbala mosi kukangama na Yayi, ti yandi lendaka ve . . . ti yandi salaka, kasi ata ti yandi zolaka kwenda. Yandi zabaka ti lukanu ya yandi twadisaka yandi na kwenda na kisika ya bampangi ya yandi kisika ba bokilaka yandi, mpe kasi Mpeve vwandaka twadisa yandi na kusala kima ya nkaka. Yandi lendaka dyaka ve kusala luzolo ya yandi mosi.

⁹² Muntu lendaka tuba, “Mpangi Saul, Mpangi Paul, beto zola nge kwiza awa, samu beto kele na yinzo-Nzambi ya kulutula nene. Beto kele na dibuundu ya kulutula nene. Makabu ya nge ke vwanda mingi, mpe bima ya nkaka dyaka.”

⁹³ Kasi na kuvwanda na lutwadusu na Mpeve, yandi banzaka, “Mu ke na mpangi mosi kuna. Mu zola kwenda kuna samu na kuvuukisa mpangi ya ngo, kunata yandi na Mfumu.” Kasi, na kutala, Mpeve twadisaka yandi na kukwenda na kisika ya nkaka. Yandi vwandaka muntu ya boloko. Ya kieleka.

⁹⁴ Oh Nzambi, kumisa beto bantu ya boloko mutindu yayi, samu na kubika lukanu ya beto mosi ya munimi, mpe na mutindu ya beto mosi ya kutadila mambu mpe mutindu ya beto ya kubanzila, samu na kuvwanda muntu ya boloko ya Yesu Klisto. Mu banza ti yina vwandaka luzabusu ya nene, na kutuba, “Mu kele muntu ya boloko ya Yesu Klisto.”

⁹⁵ Mpe beno bambuka moyo, Yandi kele Ndinga. Beno me mona? Ata yinki muntu ya nkaka ke banza, ya kele Ndinga. Beno me mona? Kana nge kele muntu ya boloko ya Ndinga, ata dibuundu lendaka kukatula nge Yawu ve. Ya kele—ya kele Ndinga. Nge kele kaka . . . Nge kele muntu ya boloko ya Yawu, yimeni. Nge fwana kusala na mutindu Ya ke na kusalaka.

⁹⁶ Ntangu yayi, yandi lendaka kwenda ve na bisika ya nkaka mutindu yandi zolaka, samu (na yinki?) Mpeve vwandaka yimina yandi. Beno bambuka moyo, ti mbala mingi, Paul mekaka na kukwenda kisika mosi, yandi lendaka banza, “Kuna mu lenda kuzwa lukutakanu ya nene,” kasi Mpeve yiminaka yandi. Ntangu yayi, yina ke monikisa ya kieleka ti Paul vwandaka muntu ya boloko? [Dibuundu me tuba, “Amen.”—Mu.] Muntu ya boloko ya Yesu Klisto, ya kukangama na Ndinga ya Yandi, na nzila ya Mpeve! Oh! Mu zola yawu. Uh-huh.

⁹⁷ Yandi vwandaka ya kukangama. Yandi vwandaka ya kukangama na muniololo, mpe na basinga ya bisengo ya luzolo, samu na kusala lukanu ya Nzambi, mpe kaka yina. Yandi vwandaka muntu ya boloko. Yandi vwandaka ya kukangama na basinga ya bisengo ya luzolo. Yandi vwandaka ya kukangama na kizitu ya Klisto. Yandi lendaka ve kukangama na kizitu ya nkaka. Yandi vwandaka ya kukangama na Yandi na nzila ya kizitu. Mpe kisika yina Ntwadisi vwandaka kwenda, kuna yandi lungaka kwenda. Ata wapi mutindu nzila vwandaka ve, mbote to yimbi na lweka *yayi* to na lweka *yina*, yandi lungaka kaka kukwenda kisika yina Ntwadisi mpe kizitu vwandaka kwenda.

⁹⁸ Oh, na nkokila yayi, kana beto, bantu ya Branham Tabernacle, lendaka kaka kukuma bantu ya boloko; ya munimi ya beto, ya lukanu ya beto mosi, samu ti beto kupesama muvimba nyonso mpe kuvwanda ya kukangama na nzila ya kizitu ya Yandi. Ata nyonso bantu ya yinza lendaka kubanza, yinki bantu ya yinza ke sala, beto kele ya kukangama na basinga ya bisengo ya luzolo, beto kele bantu ya boloko. “Makulu ya munu kele ya kukangama nyonso na Klisto na mutindu ti, ya lenda kwenda na kubina ve. Meso ya munu kele ya kukangama nyonso na Klisto, tii mu, ntangu mu ke mona bakento ya ntangu yayi kutambula kimpene na nzila, Ya ke sala ti mu balula yintu ya munu. Ntima ya munu—ya munu nyonso kele ya kukangama na kizitu ya luzolo ya Yandi, na mutindi ti luzolo ya yinza yayi, kele dyaka ve. Luzolo ya munu kele ya kukangama mingi na Yandi, na mutindu ti mu zaba dyaka ve yinki kele balukanu ya munu. Kaka, ‘Kisika

nyonso Nge ke twadisa munu, mu ke landa, Mfumu.’ Mu ke vwanda muntu ya boloko.” Beno me mona?

⁹⁹ Paul vwandaka yandi nyonso muntu ya boloko. Yandi vwandaka zonza ve mambu ya luvunu. Mpeve-Santu longisaka yandi, na kuvingilaka kaka, na Ndinga. Na kutala, ba longisaka yandi na mutindu mosi, kasi—kasi Nzambi longisaka yandi na mutindu ya nkaka mbala yayi. Mpeve-Santu longisaka yandi na kuvingilaka na Mfumu, ata yinki vwandaka balukanu ya yandi.

¹⁰⁰ Ntangu yayi, na lusadusu ya Mpeve-Santu, mu ke talisa beno kima mosi. Beno me mona? Ntangu yayi beto baka mwa kifwanukusu.

¹⁰¹ Kilumbu mosi, Paul na Silas, vwandaka tambula na nzila ya mbanza mosi kisika vwandaka mvumbukulu. Mpe mwana ya kento mosi, yina vwandaka na mpeve ya yimbi vwandaka kulanda yandi ntangu nyonso, na kubokaka na manima ya yandi. Na ntembe ve Paul zabaka kwandi ti yandi vwandaka na lutumu, na kuvwandaka ntumwa, na kusingisa mpeve ya yimbi yina na kati ya kento yina. Kasi beno monaka? Yandi vingilaka, kilumbu na manima ya kilumbu, tii, mbala mosi, Mpeve-Santu tubilaka yandi, mpe tubaka, “Ntangu me lunga.”

¹⁰² Mpe kuna yandi tubaka, “Nge mpeve ya yimbi, basika na kati ya yandi.” Beno me mona? Yandi zabaka kuvingila na Mfumu.

¹⁰³ Mpe ya kele kuna bantu mingi bubu yayi ke talisaka nsoni na Ndinga. Bawu ke basika na dibanza ya nkaka. Bamvumbukulu yikwa me lembisa bantu samu na kima ya mutindu yina, samu ti mulongi ke vingilaka ve na kuzaba yinki Mfumu ke tuba! Mingi na kati ya bawu ke tuba, “Beno kwiza awa,” mpe bawu—bawu ke kwenda na nswalu nyonso samu ti kimvuka tubaka, “Beno kwenda.” Kasi Mpeve-Santu lendaka tuba kima ya nkaka. Kasi, dibanza ya muntu yina na luzolo ya kukuma nganga-Nzambi ya mbanza, to—to kima ya nkaka, to kuluntu, to mfumu-nganga-Nzambi, to kima mosi ke—ke tumisa yandi, “Nge fwana kwenda.” Mpe, na kutala, yandi zaba kwandi, “Mpeve-Santu ke na tubaka, “Kwenda *awa*.” Beno me mona? Yandi kele ya kukangama na manima ya kimvuka ya yandi. Yandi kele muntu ya boloko ya kimvuka.

¹⁰⁴ Kasi kana yandi kele ya kukangama na manima ya Klisto, Mpeve-Santu ke twadisa yandi. Yandi...?.?.?.Beno me mona? Yandi, yandi kele ya kukangama na kizitu, muntu ya boloko. Yina muntu ya nkaka ke tuba ke soba kima ve; ya kele—ya kele—ya kele kisengo ke na salaka makelele mpe ngoma ke na wakisaka ndinga. Yandi ke kuwa kaka Ndinga ya Nzambi, mpe yandi ke zonza kaka Yawu me zonza. Yandi ke tuba ata kima ve.

¹⁰⁵ Muntu lendaka tuba, “Oh, oh, Mpangi Jones!” To, kuna, Mpangi Roberts, to, bantu ya mfunu yayi ya yinsi ya beto

bubu yayi, mutindu Tommy Hicks, to—to—to Oral Roberts, to—to Mpangi Tommy Osborn, milongi ya nene yina. Kana muntu lendaka tuba, “Kutuba, kwiza awa, Tommy. Nge kele muntu ya nene ya Nzambi.” (To Oral.) “Mpe mu—mu ke na ngwa-nkazi ya munu yina kele ya kulala awa, yina ke—yina ke na kubelaka na fulu. Mpe yandi ke—yandi ke na kimbevo. Mu zola ti nge kwiza awa. Mu banza ti nge ke na lulendo ya kubelusa yandi.” Beno me mona?

Mpe ya lendaka sala ti Mpeve-Santu tubila yandi, “Ntangu yayi ve.”

¹⁰⁶ Kasi, samu na bundiku, na muntu yina, yandi ke kwenda kwandi na yandi. Kana yandi kwenda ve, yandi ke kuma mbeni ya muntu yina. Muntu yina ke tuba, “Mbote, yandi kwendaka na kisika ya *kingandi*, yandi belusaka mwana yina to mwana ya bakala yina. Mu zaba ti yandi salaka yawu. Kasi munu yina kele mpangi ya yandi, ya bamvula mingi, mona, mpe yandi me manga kukwiza na kisika ya munu.”

¹⁰⁷ Kasi kana Mpeve-Santu twadisa yandi ve na kukwenda, ya kele mbote ti yandi vwanda, kana yandi kele ya kukangama na manima ya Nzambi. Mpangi ya yandi, ya luzolo. Kasi ya kele mbote ti Mpeve-Santu twadisa yandi samu na kukwenda kuna, samu ti ya ke sala ata dyambu mosi ya mbote ve, na kutala. Mu me lutilaka kuna mbala mingi.

¹⁰⁸ Kasi Paul vwandaka vingila kaka na Mpeve na kuzaba yinki ya kusala. “Vingila na Mpeve,” tubaka. Yandi vwandaka longa kuna, mpimpa mosi. Na kubasikaka kuna. Yandi monaka kikata mosi. Mpe na mbala mosi, Mpeve tubilaka yandi, mpe yandi tubaka, “Mu me tala. . .” Wapi mutindu? Kaka mutindu mosi ntangu bawu zolaka kudyama na kati ya maza, na kisanga mosi. Beno me mona? “Mu me tala ti nge ke na lukwikilu samu na kubeluka. Telama. Yesu Klisto me belusa nge.” Beno me mona? Tala. Yandi—yandi vwandaka. . . Yandi vwandaka ya kukangama na kizitu. Keba ve yandi salaka mvumbukulu ya lumingu mosi kuna mpe ata kima salamaka, kasi yandi vingilaka ti Mpeve-Santu tubila yandi. Beno me mona? Yandi vwandaka ya kukangama na kizitu ya mbokolo yina.

¹⁰⁹ Ntangu yayi beno ke na kutuba, “Mpangi Branham, nge me soba yina ke tubaka na Lumingu, yina nge tubaka ti nge vingilaka ntangu nyonso yayi.”

¹¹⁰ Mpe, kasi, beno bambuka moyo, ya vwandaka Mpeve-Santu zonzilaka munu kuna na nzila, mpe tubaka, “Mu ke na kufidisa dyaka nge kuna na kisika ya bambevo mpe bayina kele na mpasi.” Beno me mona? Ya kele kutumama na Mpeve-Santu. Kieleka. Mu kwendaka ve ntete Yandi tubila munu na kusala yawu. Mu vingilaka na MUTINDU ME TUBA MFUMU, tii na ntangu yina mu kuzwaka MUTINDU ME TUBA MFUMU.

Ntangu yayi, ya kele ya kuswasana. Beno me mona? Ntangu yayi, Yawu, Yina ke sala luswaswanu. Ee.

¹¹¹ Yandi vwandaka vingila na Ndinga ya Mfumu. Mpeve vwandaka twadisa yandi, na kusala kaka yina Nzambi tumisaka, na yawu yandi me kuma muntu ya boloko ya Yesu Klisto. Bampangi, kana kaka beto lenda kukuma bantu ya boloko!

¹¹² Mu zaba ti mwini kele ngolo. Kasi mu—mu ke zola kutanguna mwa bantu dyaka, kana beno zola. Mu ke na sambanu to nana yina mu sonikaka awa. Kasi mu—mu zola kuzonzila muntu mosi to zole.

¹¹³ Bika beto baka muntu yayi Moïse. Yandi butukaka mvulusi. Mpe yandi—yandi—yandi zabaka yawu, ti yandi butukaka mvulusi.

¹¹⁴ Kasi ntete mu zonzila na Moïse, mu zola kupesa luzabusu yayi, ti, Nzambi fwanaka kubaka ntangu nyonso konso muntu, yina ke sadila Yandi na kieleka nyonso, samu yandi vwananda muntu ya Yandi ya boloko. Muntu fwana kubika lukanu nyonso yina kele na yandi, nyonso yina yandi kele, konso—konso kima, luzingu ya yandi, mwela, nzutu, luzolo, balukanu, mpe bima ya nkaka, samu na kukuma yandi nyonso, muntu ya boloko ya Klisto, Yina kele Ndinga, samu na kusadila Nzambi.

¹¹⁵ Beno lendaka tambula na mutindu ya kuswasana na mabanza ya beno. Keba ve, na kati ya kimvuka mosi, beno lendaka banza ti ba ke zangula beno mpe kupesa beno kima ya nene, samu ti beno vwananda bantu ya kuzabana. Kasi wapi kisika beno ke kuma? Beno ke tala ti ba me nunga beno, na manima ya mwa ntangu fyoti, tii Nzambi ke kuzwa muntu mosi yina ke zola kukuma muntu ya Yandi ya boloko.

¹¹⁶ Nzambi kele na kusosa bantu ya boloko. Yandi ke salaka yawu ntangu nyonso. Beno lendaka sosa yawu na kati ya Masonukwa. Ya fwana ti muntu mosi kuma muntu ya boloko ya Klisto, ya kuswasana na nyonso. Samu na yina, beno lenda ve kukangama na kima ya nkaka kana kaka Klisto; ata yawu vwananda tata ya nge, mama ya nge, nkazi ya nge, mpangi ya nge ya kento, bakala ya nge, kento ya nge, to muntu ya nkaka. Nge kele kaka ya kukangama na Klisto, mpe na Yandi kaka, na yina Nzambi lenda kusadila nge. Kana beno kuma kuna ve, beno ke lenda ve.

¹¹⁷ Ntangu mu ke kwendaka bisika ya nkaka, bantangu ya nkaka mu ke zonzaka na ngolo na bantu. Beno me mona? Mu—mu ke na kumekaka kukangula beno. Beno fwana kuzwa kisika ya kubanda, mutindu ntangu ya nkaka mu ke zonzaka na yina me tadila bakento yina ke zengisaka nsuki ya bawu mpe bayina ke lwataka bilele yina, mpe ke bakaka nkumbu ya Muklisto. Mpe kutuba, “Yina ke kaka mwa kima ya fyoti.” Mbote, kasi beno fwana kubanda kisika mosi. Na yina beno banda ntete, na kisika ya ABC ya beno. Beno me mona? Mpe kubika bansadulu ya yinza,

na kutala, mpe kukuma muntu ya boloko ya Klisto. Mpe kuna kulandila kaka, na kuzenga nyonso, tii na kumanisa singa ya nsuka kuzengana. Kuna beno ke—beno ke—beno ke kuma muntu ya boloko, beno me kuma na yisi ya lutumu ya Yandi, Yandi—Yandi me baka beno na yisi ya lutumu ya Yandi.

¹¹⁸ Ntangu yayi, Moïse zabaka ti yandi butukaka mvulusi. Yandi zabaka yawu. Mpe beno tala, na lukanu yina vwandaka na Moïse; na kuzabaka yina mama ya yandi tubilaka yandi kuna, yandi yina dikisaka yandi.

¹¹⁹ Na ntembe ve ti, ntangu Moïse mwana ya fyoti butukaka, mama ya yandi tubaka na yandi, “Nge zaba, Moïse, ntangu. . . Tata ya nge, Amram, mpe munu sambilaka na kutatamana. Beto zabaka, mpe monaka na kati ya Ndinga, ti ntangu kumaka yina mvulusi zolaka kwiza. Mpe beto sambilaka, ‘Mfumu Nzambi, beto zola kumona mvulusi ya ngo.’ Mpimpa mosi, Mfumu tubilaka beto, na vision, ti nge ke butuka, mpe nge ke vwanda mvulusi. Beto vwandaka ve na boma ya lutumu ya ntinu. Beto talaka ve na yina ntinu tubaka. Na yina, beto zabaka ti nge butukaka mvulusi. Ntangu yayi, Moïse, beto zabaka ti beto lendaka ve kukulisa nge mutindu ya kulunga.”

¹²⁰ Ntangu yayi beno bambuka moyo ti, bawu vwandaka kuna, nkama yiya ya bamvula na Egypte. Beno me mona?

¹²¹ “Mpe beto—beto zolaka ti nge kuzwa kima ya kulunga, malongi ya mbote, kulongoka mbote. Na yina, mu bakaka nge mpe tulaka nge na kati ya mwa nzasa, mpe tulaka nge na maza ya Nile. Mpe mutindu ya kele ya ngitukulu, ti maza nataka mwa nzasa ya ngo na kati-kati ya bidyadya mpe matiti, mpe nataka yawu ntama kuna, mpe nataka yawu, tii na yinzo ya ntinu Pharaon, kisika yina. . . Mwana ya kento ya Pharaon vwandaka, kisika yina yandi ke yobilaka. Mpe mutindu yina—yina mu zabaka ti yandi ke vwanda na nsatu ya kento samu na kukulisa nge.”

¹²² Mpe na bilumbu ya bawu, ya kieleka, bawu vwandaka ve na binwikunu-mabene yayi samu na kunwikisa bana ya fyoti, na yina yandi zolaka kuzwa kento samu na kuyundula mwana. Kuna. . .

¹²³ “Mpe, ya kele Miriam, mu tindaka kuna. Yandi telamaka kuna, mpe yandi tubaka, ‘Mu zaba kisika yina mu lenda kuzwa kento yina lenda nwikisa,’ mpe yandi kwizaka mpe bakaka munu. Mpe, Moïse, bamwelo nyonso ke ya kukangama. Cherie, ntangu yayi nge me kuma na bamvula kumi na sambanu, mpe nge ke kuma mwana ya bakala ya Pharaon. Mpe kilumbu mosi nge ke vwanda mvulusi yina ke basisa bantu awa.”

¹²⁴ Balukanu ya Moïse bandaka kukuma mingi. “Mu ke longoka, mama. Mu ke longoka nyonso yina mu lenda kulongoka. Nge zaba yinki mu ke sala? Mu ke longoka wapi mutindu ya kukuma soda, mpe mu ke zaba wapi mutindu ya kubasisa bantu yayi

awa. Mu ke kuma mfumu ya nene ya basoda, mfumu-nganga-Nzambi, na yina mu ke zaba wapi mutindu yawu ke salamaka. Mpe mu ke—mu ke basisa bawu. Mu ke kuzwa doctorat ya munu ya philosophie to ya droit. Mu—mu ke sala yawu.”

¹²⁵ Ya kele mutindu “Mupelo Chiniquy,” kana beno me tangaka babuku ya yandi ve. Mbote mingi. Yandi “zolaka kuvuukisa bantu nyonso ya Misyoni,” beno zaba, kasi yandi, kumaka dyaka mosi ya bawu. Na yina, nganga-Nzambi ya nene yayi, na bamvula me luta, “Mupelo Chiniquy,” beno fwana kuzwa buku ya yandi mpe kutanga yawu. Ba ke bokilaka yandi, “tata.” Yandi kele kaka Mpangi Chiniquy, yandi vwandaka yina. Beto ke bokilaka ata muntu ve “tata,” na mutindu yina. Na yina beto me bakula ti—ti beto. . . Yandi zolaka tanga Biblia, samu yandi basika kuna mpe kutalisa luvunu ya lukwikilu ya Misyoni mpe kukumisa yawu nyonso dibuundu ya Katolika. Mpe ntangu yandi kwendaka tanga Biblia, Mpeve-Santu me kwiza na zulu ya yandi, mpe yandi kuzwaka Mpeve-Santu, mpe kuna—kuna yandi me kuma mosi ya bawu.

¹²⁶ Na yina beno tala yayi, ti Moïse longokaka nyonso. Samu ti, yandi—yandi zabaka. Yandi vwandaka na mayela mingi, kuzwaka malongi mingi, mayela ya kulutila! Na mutindi ti, muntu ve. . . Yandi lendaka kwandi kulongisa bantu ya Egypte. Tii, kulendaka kwandi kulongisa bantu ya bawu ya mayela. Yandi lendaka kulongisa bamfumu ya basoda ya bawu—ya bawu yinki kele busoda. Yandi vwandaka muntu ya mfunu. Mpe bantu vwandaka zitisa Moïse, samu na bunene ya yandi. Oh, wapi luzabu! Oh la la! Yandi vwandaka mfumu-ya-banganga-Nzambi, to mutindu pape. Yandi vwandaka muntu ya nene. Mpe yandi vwandaka muntu ya lulendo. Mpe yandi zabaka ti yandi butukaka na kusala yayi, mpe ba longisaka yandi, na lukanu ya nene, na kusala yawu.

¹²⁷ Ya kele kaka mutindu mosi bubu yayi. Mu me tuba ve ti bantu yina, ke longokaka na balukolo yayi, mu me tuba ve ti. . . Mutindu bawu ke kuna, na Weste, na ntangu yayi, ba ke na kutungaka lukolo mosi ya théologie ya mafunda nkama mosi na makumi tanu ya ba-dollard, mona, bantu ya Pentecôte, lukolo ya mafun- . . . ya mafunda nkama mosi na makumi tanu ya ba-dollard. Na munu, yina zolaka vwanza samu na bayina ke kwendaka na kulonga bisika nyonso na yinza. Beno me mona? Beno me mona? Beno me mona? Kasi, ata nyonso yina, yinki ba ke salaka ntangu ba ke basikaka kuna? Yinki ba ke kumaka? Nkonga ya ba Ricky. Ya kieleka. Mpe ya kele mutindu yina ba ke manisaka kuna. Ya kele konso ntangu mutindu yina, na kati ya bawu, mpe ya ke tatamana kaka mutindu mosi. Beno me mona?

¹²⁸ Awa beto me bakula, ti, ntangu, Moïse, na mayela ya yandi nyonso, mpe bubu yayi, na yina nyonso bawu ke na kulongokaka, yina ke na kukumisa bawu, bamfumu-nganga-Nzambi ya nene mpe nyonso ya nkaka yina, na lukanu ya kulutila nene, yinki

beto ke sala? Balukanu ya beto me kuma mutindu kwandi mosi na yina vwandaka na Moïse. Beno me mona?

¹²⁹ Nzambi, ntete Yandi baka muntu na diboko ya Yandi, Yandi fwana kukatula na yandi lukanu ya yandi. Yandi fwana kukatula na yandi nyonso yina yandi longokaka.

¹³⁰ Yandi basikaka, mpe yandi kuulaka; yandi kufwaka muntu mosi ya Egypte. Mpe yandi, mpe ntangu yandi salaka yawu, yandi bakulaka ti yandi salaka kima ya yimbi. Yandi zolaka kusala yawu ve. Ya vwandaka mutindu yina ve. Mpe Nzambi zolaka kubenda yandi kuna na kisika ya kukondwa maza, na ntoto ya kuyuma, na kisika ya kuyuma.

¹³¹ Beno me tala, ya kele ya ngitukulu ti, Nzambi ke nataka, na ntoto ya kuyuma, bayina Yandi ke pesaka nsangu.

¹³² Yandi nataka Paul na ntoto ya kuyuma, samu na kulongisa yandi, samu na kutubila yandi yinki vwandaka vision nyonso ya nene yayi, kuna na ntoto ya kuyuma. “Kwenda na kisika mosi ya kuyuma.” Mpe yandi vwandaka kuna tii ntangu Nzambi talisaka yandi yinki ya kusala.

¹³³ Mpe na ntangu ya Moïse, Yandi nataka yandi na ntoto ya kuyuma. Bumbaka yandi kuna bamvula makumi yiya, mpe katulaka yandi théologie ya yandi nyonso mpe lukanu ya yandi nyonso. Oh, wapi ntangu, yina yandi lendaka kumona na manima mpe kutala kisika yandi lembanaka. Mpe beto, na nkokila yayi, na kutalaka lukanu ya beto—ya beto, beto zola kusala mutindu mosi.

¹³⁴ Beno banza na lukutakanu ya kusambila bambevo, mpe kumona na mwa bamvula lutaka kana Mfumu salaka kima mosi, samu na kubanda kuvutula lunyakusu ya bambevo, mpe na ya nkaka.

¹³⁵ Bantu nyonso, konso kimvuka, mutindu Yawu kwizilaka ve na nzila ya kimvuka ya bawu, ba zolaka kusosa munganga. Mpe yinki beto me sala? Bika beto tala yawu mwa ntangu fyoti. Beto me sala mutindu mosi na yina Moïse salaka. Beto me basika mpe me meka na ngolo ya beto na kuyidika kifwani ya kimangu. “Mu ke na kuwaka nsunga ya kimbevo. Mu—mu—mu ke na menga na diboko ya munu,” mpe ba ke fwanikisa kimangu. Beno me mona? Mpe yinki beto me kuzwa? Bantu ya nkaka samu na bampasi, me nyonga mpe me kuma bikolo-mbungu, bilawu, mpe me soba mabanza ya bawu. Mpe bawu me manga na kulanda dyaka, dibanza ya pentecôte, mpe me vutuka manima samu na kuyidika bimvuka mpe bima ya nkaka. Beno me mona?

¹³⁶ Yinki beto me sala? Beto me kufwa muntu mosi ya Egypte. Ya kele kieleka. Mpe beto me meka. Beto me sala ngolo. Beto me futa. Beto me kusala na ngolo nyonso, beto me lutisa bampimpa muvimba na balukutakanu ya lusambulu, tii ndinga ke kawuka beto. Mpe—mpe beto me meka na kuyidika kima mosi, mpe kusala kima ya nswalu, mpe bima nyonso ya mutindu yina, mpe

kutala ti yawu me bonga kwandi ve. Beto lunga kuvutuka na ntoto ya kuyuma. Ya kieleka. Yinga, tata. Beto ke kufwa nzutu mpe kusala nyonso. Samu na yinki beto lendaka kubika kwandi ve? Ya kele yina beno fwana sala, mona, beno vutuka manima mpe beno bika. Samu na yinki, beto me sala mutindu mosi yina bawu salaka, mutindu mosi yina Moïse salaka. Yina ke sala kima ya mbote ve. Na manima ya bamvula makumi yiya, yandi kumaka muntu ya boloko ya Ndinga ya Nzambi. Yinki beto ke na kumeka kusala?

¹³⁷ Ntangu, Lusakumunu ya nene me kwiza, mpe kutalana ya bima nyonso ya nene yayi yina Nzambi zabisaka beto: wapi mutindu beto fwana butuka dyaka; mpe wapi mutindu beto fwana kuzwa Mpeve-Santu; mbotokolo na Nkumbu ya Yesu Klisto; mpe bima nyonso yayi.

¹³⁸ Beno me mona, bantu, na kisika ya kungakama na Ndinga yayi, na kuvwanda ya kukangama na Yawu, yinki ba salaka? Bawu ke banda na mabanza ya bawu ya mabuundu, yina kondwaka yimeni, mpe kumeka kuyidika kima mosi yina ke talana mutindu Kieleka.

¹³⁹ Bika mu sikama kwandi kuna. Beno me mona? Mu ke na kivuvu ti beno ke na mayela mingi samu na kubakula yina mu zola tuba. Beno me mona? Kasi, samu na yinki, tala yinki ya pesaka. Beno banza na yawu.

¹⁴⁰ Yinki kele na beto, na nkokila yayi? kana kaka yinsi ya kifuluka na bantu ya bimvuka: yina ke na kumanga Masonukwa ya Nzambi; bantu yina ke zola kubokila Luzingu ya Mpeve-Santu, ti, “Ya kele mabanza ya bantu”; bantu yina ke zola ve kima ya muntidu yayi kukota na kati ya dibuundu ya bawu; mpe ba lenda kupesa muswa ve ti beno zonzila Kima mosi na yina me tadila nkuna ya nyoka, Luzingu ya kukonda nsuka, mpe bima yina Mpeve-Santu zabisaka mpe monikisaka ti ya kele Ndinga. Mu ke bokilaka ntangu nyonso bantu ya ntembe, na kwiza bangisa muntu kana ya kele luvunu.

¹⁴¹ Yinki ba me kuzwa? Kima mutindu mosi na yina vwandaka na Luther, mpe na ba ya nkaka, mona, bawu me kufwa muntu ya Egypte. Yinki fwana. . . Yinki ya vwandaka? Keba ve yandi nataka muntu mosi na kubanda. . . na kubika muyibi, to keba ve ya kukwikama na kento ya yandi. Kasi yinki beno me sala na yandi? Kinama ya dibuundu. “Kwiza mpe kota na nkonga ya beto.” Beno me mona?

¹⁴² Muntu ya kufwa yina vwandaka basika nsunga vwandaka kaka kima yina yandi lendaka talisa misapi, mutindu kima ya nene yina yandi me sala, na bamvula makumi yiya yina yandi longokaka; muntu ya Egypte ya kulala kuna, ya kupola mpe ya kufwa.

¹⁴³ Ya kele kaka mutindu mosi na yina ke na kusalamaka na nkokila yayi. Kima kaka mosi yina beto lenda kutalisa, na

manima ya reveil yayi yina me kwenda na bayinsi ya nkaka (mutindu ba lenda tuba), kele nkonga ya binama ya dibuundu ya nsunga yina zaba ata kima mosi ve na yina me tadila Nzambi mutindu Hottentot lendaka zaba mpimpa na Egypte. Ya kieleka. Ti, kana beno zonzila bawu Ndinga ya Nzambi, ba ke tuba, “Mu ke kwikilaka Yawu ve.” Ba ke tuba, “Ata nyonso yina beno lenda tuba, mu ke kwikilaka Yawu ve.” Beno me mona? Beno me mona? Ya kele kima mosi ya yimbi mingi na kutalisa, na manima ya bampasi mpe bamvita mpe nyonso yina beto kuzwaka.

144 Ya lenda vwanda ti beto talisa lukolo mosi ya nene, kasi ya kele ya kufwa. Beto lenda kutalisa kimvuka mosi, kasi ya kele ya kufwa. Ya ke na kubasisa nsunga. Mutindu kaka kisika yina beto basikaka. “Mutindu ngulu ya kento ke na vutukaka na poto-poto, mpe yimbwa na yina yandi lukaka,” ntangu beto ke kuvutukaka. Muntu mosi ya Egypte ya kufwa.

145 Ntembe ve ti muntu mosi tubaka, “Moïse, mbote, nge ke dyaka na kyadi ve samu na bantu? Ba bokilaka nge samu na kusala yayi.” Muntu yina zabaka Moïse, mpe zabaka ti ba bokilaka yandi samu na yina. “Mpe ve. . . Nge ke dyaka ve na luzolo ya bantu?”

“Ve, tata.”

146 “Mbote, samu na yinki, nge me kwenda ve kuna, na kusala yayi? Mpe samu na yinki nge lenda kwenda ve kuna, samu na kumeka yayi? Mpe samu na yinki ke me landa ve ba ya nkaka?”

147 Moïse vwandaka kisika yina ba vwandaka katula yandi nyonso, tii ntangu yandi kuzwaka kimbangi na divunda yina vwandaka pela tiya, yina tubaka Ndinga. “MU KELE Nzambi ya Abraham, Isaac, mpe Jacob. Mpe mu me bambuka moyo na nsilulu ya Munu. Mpe Mu me kulumuka na kuvuukisa bawu. Mu ke fidisa nge na kusala yawu.” Kaka Yina.

148 Yandi monaka Ndinga, kasi lukanu ya bantu ve to bansatu ya bantu ve. Kuna nani yandi kumaka? Yandi zolaka dyaka ve kunwanisa bantu ya Egypte. Yandi zolaka dyaka ve kutala kima yina. Kasi yandi me kuma muntu ya boloko. Amen. Yandi kimaka bamvula makumi yiya, ba vwandaka katula yandi nyonso, kasi kuna yandi kumaka muntu ya boloko, na divunda ya tiya, Moïse muntu ya lulendo na mayela ya yandi nyonso. Biblia me tuba ti Moïse vwandaka muntu mosi ya lulendo na ndongosolo to na bisalu, kuna na Egypte.

149 Kasi beno tala yinki muntu ya nene ya théologie yayi salaka na Ntwala ya divunda ya tiya. Yandi zonzaka kaka ti yandi lenda ve. Ntangu yandi monaka lukanu ya kieleka ya Nzambi, yandi zonzaka ti yandi lenda ve kusala yawu. Kasi na kutala, yandi longokaka mayela nyonso ya théologie yina ba longisaka yandi, yandi longokaka na lukolo ya kulutula mbote ya bawu. Kasi, na kutala, yinki yandi lendaka sala ntangu yandi. . . Dikunzi ya Tiya yina vwandaka kuna na zulu ya divunda? Tubaka, “Mu

zaba ata kuzonza ve. Um-hum. Mfumu, nani mu kele, samu ti mu kwenda?” Beno me mona?

¹⁵⁰ “Katula basapatu ya nge, Moïse. Mu zola kuzonzila nge. Katula yina ya nge, na basapatu ya nge. Nge yandi yayi—nge yandi yayi ya fukama na ntoto. Mu zola kuzonzila nge.”

¹⁵¹ Yandi lendaka ata kuzonza ve. Na kumanisa, muntu ya boloko ya kusolama, mbikudi ya kusolama, kaka mutindu Paul vwandaka ya kusolama. Moïse vwandaka ya kusolama, mvulusi. Mpe kuna, na kumanisa, Nzambi kuzwaka muntu ya Yandi ya kusolama muntu ya boloko ya Yandi. Oh, alléluia! Yandi lendaka kwenda kisika kana kaka Ndinga ya Nzambi tubila yandi na kukwenda. “Nani mu ke tuba me fidisa munu?”

“MU KELE.”

“Wapi mutindu mu ke sadila yawu?”

“Mu ke vwanda na nge.”

¹⁵² “Ee, Mfumu, kaka mutindu Nge me tuba. Munu yandi yayi.” Oh! la! la! Ti, yandi kele muntu ya boloko.

¹⁵³ Yandi ke landa dyaka ve dibanza ya yandi. Awa, ba longisaka yandi na kuvwanda mfumu ya basoda. “Beno nangula, bambele! Beno vutuka na manima!” Ba longisaka yandi samu na kukwendaka na ntwala, “Ba-chariot, ya kukubama! Makonga, na ntwala! Na kunwana!” Tala mutindu yandi zolaka kununga. Yina kele yina yandi longokaka.

Kasi yandi tubaka, “Mu ke sadila yinki?”

Yandi me tubila yandi, “Yinki kele na diboko ya nge?”

¹⁵⁴ “Nkawa mosi.” Ntangu ya nkaka Nzambi ke salaka bima ke sekisaka, samu na dibanza ya kimuntu. Beno me mona? Nkawa mosi na diboko ya yandi. Mandefo ya yinda. Muntu ya bamvula makumi nana. Kento ya yandi na zulu ya mwana ya mpunda; mwana ya yandi ya fyoti na luketo. Mwa, maboko ya yandi ya kununa, yina vwandaka tekita; simbaka nkawa mosi. Yintu ya yandi ya kutala na zulu, samu ti yandi vwandaka na MUTINDU ME TUBA MFUMU. Samu na yinki? Na kumanisa yandi kumaka ya kukangama.

¹⁵⁵ Yandi vwandaka muntu ya boloko. “Mu ke tambula kaka kana Ndinga nata munu. Mu ke zonza kaka kana Ndinga zonza.”

“Wapi kisika nge ke na kwendaka?”

¹⁵⁶ “Mu ke na ntumunu mosi: kutelama na ntwala ya Pharaon mpe mu ke talisa yandi, na nzila ya nkawa yayi, ti Nzambi me fidisa munu.” Amen.

“Yinki nge ke sala na manima ya yawu?”

“Yandi ke kubika kima yina ke landila, na manina ya kusala yayi.”

157 Beno bawu yayi. Beno ke kaka na kima mosi ya kusala, ya ntete, na nkokila yayi: kupesama, kukuma muntu ya boloko. Beno banza na beno mosi ve to kima ya nkaka ve. Beno kuma muntu ya boloko.

158 Moïse kumaka muntu ya boloko, yandi tubaka ti yandi lendaka dyaka ve kuzonza. Na kumanisa, ntangu Nzambi kuzwaka yandi na diboko ya Yandi, yandi lendaka kwenda kaka kisika yina Nzambi vwandaka twadisa yandi. Kisika yina, Yandi zabisaka yandi Ndinga. Yandi zabaka ti yawu vwandaka Ndinga, na yina yandi tumamaka na Ndinga. Mpe kuna Mpeve-Santu, Nzambi, sungikaka Moïse na luzolo ya Nzambi.

159 Ya kele mutindu mosi na yina Yandi salaka na Paul. Yina ke kieleka? [Dibuundu me tuba, “Amen.”—Mu.] Yandi kangaka Paul; Juif yayi, ya mwa mbombo ya fyoti ya kukondama, yandi yina zola kuvwenza, oh, na ba-doctorat ya philosophie mpe ya droit ya kusonama nyonso na zulu ya yandi. Kasi Yandi tubaka, “Mu ke lakisa yandi bampasi nyonso yina yandi ke tala samu na Ndinga.” Beno me mona? Mpe yandi . . .

160 Mpe na yina Paul na kuvwandaka kuna mpe kumonaka Ndinga, yandi monaka ti yina vwandaka Yesu, na yina yandi nangunaka maboko ya yandi mpe kumaka ya kukangama na Yandi. Luzolo ya Nzambi kangisaka yandi na Ndinga. “Yandi ke nata Nkumbu ya Munu na Bantu ya Makanda.” Mpe kuna yandi kwendaka.

161 “Moïse, MUNU KELE Nzambi ya bankooko ya nge. MUNU KELE Nzambi ya Abraham, Isaac, mpe Jacob. Mu me bambuka moyo ti Mu silaka bawu, mpe ntangu ya nsilulu me kuma penepene. Mpe Mu me mona bampasi ya bantu ya Munu. Mu me bambuka moyo na nsilulu ya Munu. Mpe Mu me kulumuka samu na kukangisa nge. Nge zaba yinki Ndinga tubaka. Mu me kanga nge samu na kukwenda kuna, me kangisa nge na lulendo, samu na kukwenda kuna na kuvuukisa bantu ya Munu. Mpe baka nkawa yina ke na diboko ya nge, mutindu kimbangi, samu nge me mona kimangu yina salamaka na yawu.” Kaka mutindu mosi na David, na lanse ya matadi. Beno me mona?

162 Yandi kukisungikaka, yandi mosi, mpe kwendaka kuna. Na kumanisa, Nzambi kuzwaka muntu yina vwandaka ya Yandi, yina kangamaka na Yandi, mpe yina lendaka ve kwenda kisika kana kaka ti Ndinga ya Nzambi tubila yandi na kukwenda. Kana kaka bantu lendaka sala yina, bubu yayi! Kuna, yandi vwandaka muntu ya Yandi ya boloko, muntu ya boloko ya luzolo, yina kangamaka na singa ya luzolo, na—na Nzambi, mutindu Paul vwandaka ya kukangama na singa ya luzolo ya Nzambi.

163 Kaka mutindu Paul, bawu nyonso zole longokaka mutindu mosi. Ba longisaka Moïse, beno zaba, samu na kuvuukisa bana ya Israël na ngolo ya busoda. Ba longisaka Paul samu na kukatula bawu na maboko ya bantu ya Rome mpe kupesa bawu

kimpwaza, na nzila ya luzabu ya yandi ya nene ya masonukwa na yinza na kilumbu yina. Balukolo ya nene, vwandaka na lutwadusu ya Gamaliel.

¹⁶⁴ Mpe bawu nyonso zole kwendaka na ntoto ya kuyuma, um—hum; me vutuka mpe me kuma bantu ya kuswasana. Bawu nyonso zole monaka Dikunzi ya Tiya. Mpe bawu nyonso zole vwandaka bambikudi. Yina ke kieleka? [Kimvuka me tuba, “Amen.”—Mu.] Bawu nyonso zole, bambikudi. Mpe Dikunzi ya Tiya zonzilaka na bawu zole, yina ke kaka kieleka, bawu kwizaka samu na kuvuukisa. Ba vwandaka kuna; ba kwendaka na ntoto ya kuyuma. Ba bikaka bayinzo ya bawu mpe kwendaka na ntoto ya kuyuma, samu na kusosa kuzaba. Ba bikaka bantu ya bawu mpe bima ya bawu nyonso, samu na kuzaba luzolo ya Nzambi. Beno me mona?

¹⁶⁵ Ba longokaka kaka na nzila mosi; Nzambi kitulaka bawu na mutindu ya nkaka. Mpe ba zolaka kaka kukuma muntu ya boloko ya muvimba, samu na kusala ve mutindu yina ba zolaka kusala, kasi kusala na mutindu yina Nzambi zolaka ti bawu sala. Yandi kele mutindu mosi mazono, bubu yayi, mpe ntangu nyonso.

¹⁶⁶ Beto kele dyaka na bamuniti kumi, samu na kutala ba yayi?

[Mpangi Neville me tuba, “Amen.”—Mu.] ¹⁶⁷ Mu ke baka na swalu nionso muntu mosi. Mu ke na kumonaka mosi na ntwala ya munu na ntangu yayi. Nkumbu ya yandi kele Joseph. Yandi vwandaka mwana ya kusolama. Yandi vwandaka kifwanikisu ya kulunga ya Yesu Klisto. Yandi butukaka mbikudi. Yandi mpe, vwandaka mbikudi. Beno me mona? Mpe yandi lendaka kumona vision. Mpe yandi vwandaka mwa ntwenya ya bakala, yandi monaka vision yina monikisaka yandi ya kuvwanda na zulu ya kiti ya kimfumu, mpe bampangi ya yandi fukamaka na ntwala ya yandi. Beno me mona? Kasi beno tala. Yandi kumaka . . . Yandi talaka ti yandi vwandaka me kuma muntu ya nene. Beno me mona? Bawu nyonso . . .

¹⁶⁸ Kasi yinki Nzambi zolaka sala? Yandi salaka kima mutindu mosi na yina Yandi salaka na ba ya nkaka. Samu ti, Moise vwandaka mvulusi, Paul vwandaka mvulusi, mpe kuna Joseph vwandaka mvulusi. Yandi vuukisaka bantu ya yandi na nsatu.

¹⁶⁹ Yinki Nzambi zolaka sala samu na yandi? Kutula yandi na boloko, kutula yandi mbala mosi na boloko. Kieleka, tata. Beno bambuka moyo, ti bampangi ya yandi tekisaka yandi, na muntu ya Egypte. Mpe ba me tekisa yandi na Potiphar. Mpe Potiphar pesaka yandi mwa kimpwaza, mpe, na mbala mosi, ba katulaka yandi yawu. Mpe kuna yandi vwandaka ya kuvwanda na kati ya boloko, na kudilaka, na kudilaka. Nzambi zolaka kukatula yandi yawu.

¹⁷⁰ Beno tala ntangu yayi. Kasi, mu banza ti, ntangu nyonso, yandi, na kati ya boloko, yandi lendaka kubambuka moyo ti

vision monikisaka ti yandi zolaka vwanda na zulu ya kiti ya kimfumu, mpe bampangi ya yandi zolaka kufukama na ntwala ya yandi, samu yandi zabaka ti dikabu ya yandi katukaka na Nzambi. Mpe yandi zabaka ti yawu zolaka kaka kusalama.

¹⁷¹ Kana beto lenda kwandi kusimba yawu na kati ya mabanza ya beto, landila Ndinga ya Nzambi, ya bilumbu ya nsuka yayi ti Yandi ke kuzwa Dibuundu mosi, Yandi ke kuzwa bantu mosi. Mpe bima yayi yina Yandi pesaka nsilulu, Yandi ke lungisa yawu. Yandi tubaka ti Yandi ke sala yawu, mpe beto ke na kuzingaka na ntangu ya ngo. Beto me kuma kuna. Yandi ke na kumekaka kwandi nyonso samu beto vwanda bantu ya kieleka ya boloko na ntangu yayi, ya kukangama na Yandi.

¹⁷² Beno kuwaka mukunga ya ntama yina beno ke yimbaka, “Mpe kuna mu kele ya kukangama na Nzambi”? Mu zola kuvwanda ya kukangama na Nzambi. Dibanza yayi me kwizila munu ntangu yayi, landila yayi. Ya kukangama kaka na Nzambi, kima ya nkaka ve, mpe beno ke kwenda kaka kana Nzambi me tuba na beno na kukwenda. Beno ke sala kaka mutindu Nzambi ke tuba na kusala, mona, na mutindu yina beno kele ya kukangama na Nzambi.

¹⁷³ Ntangu yayi beno bambuka moyo, yandi vwandaka yindula. Yandi mpe lembanaka muvimba nyonso, na yandi mosi. Ata nyonso yina yandi zabaka, nyonso yina yandi bakulaka, mpe nyonso, kasi yandi lembanaka muvimba nyonso. Ya tambulaka mbote ve. Ba tulaka yandi na kisika yina ata muntu lendaka kuwa yandi ve. Yandi vwandaka muntu ya boloko. Beno me mona? Ba tulaka yandi na kisika yina ti, bantu ya ntembe lendaka kwikila yandi ve. Beno me mona yinki mu zola tuba? [Dibuundu me tuba, “Amen.”—Mu.] Kisalu ya yandi salaka kima ve. Bantu balulaka bayintu ya bawu. Ba vwanda kipe yandi ve na boloko. Wapi kima ya mbote yina kisalu ya yandi lendaka sala? Yandi lendaka telama na boloko kusimba bisengo mpe kulonga bawu; kasi ba vwandaka landila nzila ya bawu. Beno me mona? Kasi yandi kumaka muntu ya boloko. Mpe Nzambi bumbaka yandi, muntu ya boloko, tii mambu nyonso kusalamaka. Yandi tubaka, “Yayi kele muntu ya Munu.” Nkembo! Kubwa ya muvimba!

¹⁷⁴ Na kumanisa, Nzambi kwizaka na kati ya boloko ya yandi. Mutindu Paul, mutindu bawu nyonso, Yandi kwizaka na yandi. Mpe Yandi sadilaka dikabu yina Yandi pesaka yandi, samu na kubasisa yandi kuna. Yina kele ya kieleka. Yandi basisaka yandi na boloko ya yandi. Yinki yandi salaka? Kaka na ntangu yina Yandi basisaka yandi na boloko ya yandi, ntinu pesaka yandi lutumu, ntinu ya yandi, kisika yina yandi vwandaka ya kuvwanda, na yina yandi vwandaka na yisi ya lutumu ya yandi. Ba basisaka yandi na yinzo ya boloko mpe kuzwaka lutumu, na mutindu ti, yina yandi vwandaka tuba, zolaka kusalama. Amen.

¹⁷⁵ Na kati ya boloko ya yandi, yandi vwandaka bambuka moyo ntangu nyonso ti, yandi butukaka samu na kisalu mosi. Yandi zolaka kuvwanda pene-pene na ntinu. Ba ya nkaka nyonso zolaka kufukama na ntwala ya yandi. Vision ya yandi tubilaka yandi yawu. Amen. Tekila vision ya yandi kusalama nyonso, yandi fwanaka kukuma muntu ya boloko. Amen. Mpe kuna yandi kumaka mfumu. Mpe ntangu yandi basikaka na yinzo ya yandi ya boloko, mpe kumaka muntu ya boloko ya Ndinga ya Nzambi, ti yandi lendaka kutuba kaka yina Nzambi ke tula na yinwa ya yandi na kutuba, kuna Nzambi vwandaka sala na nzila ya yandi.

¹⁷⁶ Beno tala, ti Moise vwandaka na lutumu ya kukanga bana ya ntinu ya Pharaon, kana yandi zolaka. “Kana nge tuba na mongo yayi, ‘Katuka kuna.’” Uh-huh, uh-huh. Yandi vwandaka na lutumu ya kukanga bana ya ntinu ya Pharaon. Ata ti bawu vwandaka badiakre, to balongi ya mbuta, to bawu vwandaka bimonikisi ya luyalu to banani yina bawu vwandaka. Yandi vwandaka tuba, “Mu ke kangisa beno,” mpe ba vwandaka kangisa bawu. Ya vwandaka yina. Yandi zolaka sala yawu na lukanu ya yandi mosi, na luzolo ya yandi mosi. Amen. Nkembo na Nzambi!

Oh, mu me bikana kaka na bamuniti tatu, kana mu lendaka zitisa ndinga ya munu.

¹⁷⁷ Ntangu yayi beto me bakula, ti yandi—yandi kumaka muntu ya boloko ya Nzambi, na kukatuka muntu ya boloko ya yinza. Na kisika . . . Paul, mutindu mosi. Mpe Moise, mutindu mosi, na kisika ya muntu ya boloko ya dibanza ya yandi mosi, na kukuma muntu ya boloko ya Nzambi. Mpe ntangu yandi basikaka, yandi vwandaka na lutumu ya Nzambi. Mpe ntangu yandi kumaka Paul . . . Ntangu Moise bikaka mutindu ya yandi mosi ya kubanza, ti ba katulaka yandi yawu, mpe kukatulaka yandi nyonso, yandi kumaka muntu ya boloko ya Ndinga ya Klisto. Yandi lendaka kaka kwenda kana . . .

Beno ke tuba, “Klisto?”

¹⁷⁸ “Yandi lutilaka kuzola nsoni ya Klisto na kisika ya bimvwama ya nene ya Egypte.” Na yina yandi vwandaka muntu ya boloko ya Klisto, kaka mutindi Paul vwandaka.

¹⁷⁹ Beno bambuka moyo, bawu nyonso tatu vwandaka bambikudi. Beno me mona? Mpe ya lungaka ba katula bawu dibanza ya bawu mosi, samu na kukuma muntu ya boloko ya luzolo mpe ya banzila ya Nzambi.

¹⁸⁰ Ntangu yayi, beto ke na kubambuka moyo, ti yandi vwandaka na lulendo ya kukangisa, na lukanu ya yandi mosi. Yandi vwandaka na lulendo ya kukuula, na lukanu ya yandi mosi. Yandi lendaka tuba, “Mu me kuula nge, na nkumbu ya ntinu ya munu.” Amen. Pharaon kitulaka Joseph mwana ya yandi.

¹⁸¹ Klisto ke salaka bantu ya Yandi, bantu ya boloko ya luzolo, bana ya Yandi. Mpe Yandi ke pesa bawu lutumu, mutindu mosi na yina vwandaka na Yandi. Na Santu Jean 14:12, “Yina ke kwikila Munu,” mona, “bisalu yina Mu me sala yandi mpe ke sala yawu. Yandi ke sala ya kulutila yayi.” Ntangu yayi muntu ya boloko ya Klisto me kuzwa lutumu me katuka na Ntinu ya yandi, Yina kele Klisto. Amen. “Mpe na kieleka Mu me tubila nge, kana nge tuba na mongo yayi, ‘Katuka awa,’ mpe kusala ntembe ve na kati ya ntima ya nge, kasi nge kwikila ti yina nge me tuba ke salama, nge ke kuzwa yina nge me tuba. Kana nge kangama na Munu, mpe Ndinga ya Munu na kati ya nge; kana nge kele ya kukangama na Munu,” samu Yandi mpe na Ndinga ya Yandi kele mutindu mosi. “Na mbandukulu vwandaka Ndinga, mpe Ndinga vwandaka na Nzambi. Ndinga kumaka nsuni mpe zingaka na kati-kati ya beto. Mutindu mosi mazono, bubu yayi, mpe ntangu nyonso! Kana nge kangama na Munu,” *na yayi* mpe *yina ve*, “kangama na Munu, mpe Ndinga ya Munu na kati ya nge; lomba yina nge zola, to tuba yina nge zola, yina ke salama samu na nge.” Yandi vwandaka na lulendo.

¹⁸² Beno tala, ntete yandi basika, ba zolaka kubaka yandi mpe kukatula yandi nyonso. Ba zolaka ntete kukatula yandi mwa bima ya nkaka yina tekila ba nata yandi na ntwa ya ntinu ya yandi. Beno me mona?

¹⁸³ Oh, Nzambi ntangu ya nkaka ke basisaka bantu ya Yandi mutindu yina, na kukatulaka bawu mwa balukanu ya bawu mosi, mpe kumonikisa bawu ti ba lendaka kwandi ve kusala yina ba zola kusala. Beno zaba yinki mu zola tuba. Ba kele ve—ba kele ve na kimpwanza ya kusala yina bawu zola kusala. Ntete ba kuzwa lulendo nyonso mpe kuvwanda mundongo ya luzolo ya Klisto, ba fwana kukatula bawu bima nyonso mpe kuna katalisa bawu. Ntangu ya nkaka Yandi ke nata bawu na ntoto ya kuyuma, samu na kusala yawu, samu na kukatula bawu nyonso. Mpe kuna kubasisa bawu, ya kukusa, samu na kulungisa yina Yandi tumisaka bawu na kusala. Mona yinki mu zola tuba?

Bampangi, beto me kuma na ntangu ya nsuka.

¹⁸⁴ Beno mambuka moyo, na bantangu nyonso ya nkaka, yinki Yandi salaka. Yandi zolaka kaka kubaka muntu mpe kukumisa yandi muntu ya boloko ya Yandi, kusala yandi kubika nyonso yina kele ya yandi. Yandi zolaka kubika bima nyonso yina yandi zabaka, kuzimbana nyonso yina yandi longokaka, nyonso, na kulanda luzolo ya Nzambi, mpe kulanda Nzambi.

¹⁸⁵ Yandi lendaka ve kulanda kima yina muntu ya nkaka lendaka kusala, mpe na Nzambi, mbala mosi. Ya ke ya kuswasana mingi, na ya nkaka. Beno lendaka ve kukwenda na este mpe na weste mbala mosi. Beno lendaka ve kukwenda na lweka ya bakala mpe na lweka ya kento mbala mosi. Beno lendaka sala ve mbote mpe yimbi mbala mosi. Beno lendaka ve

kulanda muntu mpe Nzambi mbala mosi. Ve, tata. Beno fwana kulanda Nzambi to kulanda muntu.

¹⁸⁶ Awa, na ntangu yayi, kana nge ke na kulandaka Nzambi mpe me kukipesa nge mosi na Nzambi, kuna nge me kuma muntu ya boloko ya Nzambi yina, ya Ndinga yina, ya luzolo yina. Ata nyonso yina kima ya nkaka ke tuba, nge me kuma muntu ya boloko ya Yayi.

¹⁸⁷ Beno kuwa. Beto me kuma na ntangu ya nsuka. Mpe mu ke tuba yayi na buzitu nyonso, na yina mwa muniti ya nsuka kele ntete. Beno tala. Yinki Nzambi, landila dibanza ya munu, ke sala mpe fwana kusala, mpe ke sala na kilumbu ya nsuka yayi, ya kele kuzwa kidadulu samu na kuyonzika. Yandi fwana kuzwa kidadulu, samu na kubula ntoto. Konso kisadi bilanga, ntangu yandi ke kwendaka na bilanga ya yandi, yandi fwana kuzwa kidadulu samu na kusadila na yawu; kieleka, yandi fwana kuzwa mbele ya yinda yina kele na meno to kima mosi, konso kidadulu, samu na kubula bambuma. Mpe bambuma me yela.

¹⁸⁸ Nzambi, baka beto na diboko ya Nge. Sala beto bisadi ya kukangama na luzolo ya Nge. Sala beto mutindu kidadulu, samu na kunata yinza yayi yina beto kele bubu yayi, ya masumu ya kusinga na kubakula ti, Yesu Klisto kele mutindu mosi mazono, bubu yayi, mpe ntangu nyonso.

¹⁸⁹ Na yina me tadila munu mosi, Nzambi, bika mu vwanda muntu ya boloko. Kana bampangi ya munu nyonso manga munu, kana banduku ya munu nyonso manga munu, mu zola vwanda muntu ya boloko ya Yesu Klisto mpe ya Ndinga ya Yandi, samu mu vwanda ya kukangama na Ndinga ya Yandi, na nzila ya Mpeve-Santu, na kutalaka ti Mpeve-Santu kusala Ndinga ya Nzambi kulungisa na nzila ya bima mutindu mosi na yina Yandi tubaka ti ya ke salama. Mu zola kuvwanda muntu ya boloko ya Yesu Klisto.

Beto sambila.

¹⁹⁰ Mu banza, na nkokila yayi, na yina beto me yinika bayintu ya beto, kana lukanu yina kele na beto, ya kuvwanda kima ya mutindu ya nkaka, to keba ve kima yina beto lenda banza, mutindu munimi, mu banza kana beto lenda kwandi kutula yawu na lweka.

¹⁹¹ Mu banza kana ya lendaka vwanda awa na toko ya bakala, na nkokila yayi, yina ke tala na kizunga ya yandi, mpe ke tuba, “Mu ke vwanda, ntangu mu ke kula, mu ke vwanda kima *yayi*.” Mu zaba ve kana nge lenda kuwa luzolo ya Nzambi na kusala na kati ya luzingu ya nge, mpe kutuba, “Ve, ve. Uh-huh, huh-uh. Mu—mu. . . Na ntangu yayi balukanu ya munu me zimbana. Na mwa bilumbu me luta, Mpeve-Santu vwanda zonzila munu. Mu—mu—mu—mu zola kumipesama na Nzambi, samu na kuvwanda kidadulu ya kubula ntoto na kilumbu ya nsuka yayi.”

¹⁹² Mwana ya kento yina ke na lukanu ya kuvwanda na nkadulu ya kento ya mbote, to—to keba ve kuvwanda mwana mosi ya kento ya kitoko, to keba ve kilumbu mosi yandi sala ti Hollywood vwanda kisika ya yandi ya kisalu, mu—mu banza kana nge zola ve na ntangu yayi kupesa lukanu ya nge na Ntwala ya Nzambi mpe na Ndinga ya Yandi, kuwa mbokolo ya Nzambi na kati ya luzingu ya nge. Nzambi zaba nani nge kele.

¹⁹³ Mu zaba ve kana ya kele na mulongisi mosi yina kele pene-pene, to kisadi mosi, muntu mosi yina ke salaka kisalu na dibuundu. Mu ke kwizaka awa, ntangu nyonso ve. Mu—mu zaba ve ndambu ya bantu yina kele ya kuvwanda awa, na nkokila yayi, kasi mu . . . mwa lutangu ya bantu yina kele awa. Mu zaba ve kana ya lenda vwanda na muntu mosi, yina zola kutuba, “Yina muntu ya nkaka ke tuba ke sala munu kima ve. Mu kele mundongo ya Nzambi na ntangu yayi. Mu—mu—mu ke longa Ndinga ya Yandi, ata mutindu yina. Ya ke sala munu ata kima mosi ve, kana kimvuka ya munu—ya munu bingisa munu, mu ke tatamana kaka na Ndinga yina. Mu—mu ke sala yawu. Luzolo ya munu kele luzolo ya Nzambi. Luzolo ya Nzambi kele luzolo ya munu. Mu ke vwanda muntu ya boloko ya Yesu Klisto. Na nzila ya mulemvo mpe lusalusu ya Yandi, mu ke sala yawu.”

¹⁹⁴ Beno banza na yawu, na yina beto me yinika bayintu ya beto. Bantu yikwa kele na lukanu yina, na nkokila yayi? Beno nanguna diboko ya beno. Me nanguna mpe, ya munu. Mu me bika nyonso. Na yina beto me yinika bayintu ya beto na ntangu yayi, malembe ntangu yayi, na yina beno ke na kubanza na yawu na ntangu yayi, na yina beno ke na kusambila.

Mu me bika nyonso,
Mu me bika nyonso,
Nyonso na Nge, Mvulusi ya munu ya
kusakumuna,
Mu me bika nyonso.
Mu me bik- . . .

¹⁹⁵ Beno me ndima yawu ya kieleka? “Mu zola vwanda muntu ya boloko.

Mu . . .

Baka munu, Mfumu. Nata munu na yinzo ya Kiyidiki banzungu, na nkokila yayi. Mwangisa munu nyonso, mpe yidika dyaka munu . . . ? . . .”

. . . na Nge, Mvulusi ya munu ya kusakumuna,
Mu me bika nyonso.

¹⁹⁶ Tata ya Mazulu, na yina ba ke na kusikaka ntete mukunga, mu me banza ti ya ke vwanda mbote na ntangu yayi, ti mu—mu sikimisa mukunga mpe kuzonzila Nge mwa ntangu fyoti. Na yina bantu ke na kuyindula, “Mu me bika nyonso,” Tata, bika beto sala yayi, mutindu ti yayi kele mbala ya beto ya nsuka samu

na kusala yawu. Bika beto kwiza na kieleka nyonso, kufinama na mesa ya Mfumu, mutindu yina yawu vwandaka salama, na balele ya kuvedila, bamwela ya kuvedila, balukanu ya kuvedila, mabanza ya kuvedila, na kumipesama beto mosi.

¹⁹⁷ Mpe bika Nzambi kubaka Ndinga ya Yandi, kukangimisa beto na Yawu, Ndinga ya Nzambi. Mpe bika Mpeve-Santu kubaka beto na ntangu yayi, na yina beto ke na kukuwaka makele ya singa yina ke na kukangaka bantima ya beto, “Katuka nkokila yayi, mu me kangama na ndinga ya nge. Ntangu yayi beno katukila dibanza ya beno. Beno baka mabanza ya Munu. Beno baka luzolo ya Munu. Mu ke twadisa beno.” Nzambi, pesa yina samu ya vwanda kimbangi na mosi na mosi ya beto.

¹⁹⁸ Bantwenya yayi yina kele ya kuvwanda awa; bakala na kento; mpe na ba ya nkaka yina ke kuma bakala na kento. Ya ke na biboba ya babakala ya kuvwanda awa, bayina kele balongi, ya bamvula mingi. Mpe, Mfumu, awa kele Mpangi Neville, munu, ke na kumataka ntama na zulu ya kikada. Bilumbu ya beto ke na kumanisaka na ntangu yayi. Beto ke na kutambulaka na nkebolo nyonso kulutila yina beto vwandaka sala. Beto ke tala kisika yina beto ke dyata. Beto kele ve na kivuvu kisika beto ke na kudyata, na nzonzolo ya kimuntu, mutindu ntangu ya ntama. Kasi, Mfumu, na yina beto ke na kumona luzingu ya beto yina ke na kuzulukaka, mpe makulu ya beto kele na kivuvu ve kana Nge simba diboko ya beto.

¹⁹⁹ Na ntangu yayi, Nzambi, baka beto, Nge zola kwandi? Baka bantima ya beto mpe luzolo ya beto na diboko ya Nge Mosi, mpe bika beto kukuma bantu ya boloko, na nkokila yayi, ya Ndinga, ya Klisto. Bika beto kuzinga balunzingu ya bunzambi awa. Bika bakento yayi, matoko ya bakento yayi, matoko ya babakala yayi, bana ya babakala mpe bana ya bakento, kubika luzingu ya bawu, Mfumu. Mpe bika dibanza ya bawu kukuma dibanza ya kusadila Yesu Klisto. Mpe bika beto kukuma bantu ya boloko ya bumbote ya Yandi Nzambi mpe ya luzolo. Pesa yawu, Mfumu.

²⁰⁰ Kaka yina mu zaba kusala, Mfumu. Mwa bampova yayi yina kele ya kidi-kidi, mpe mu—mu ke na kivuvu ti Nge ke sungika yawu, na mutindu ya mbote. Samu ti, mwini kele ngolo awa, mpe bantu ke zola kuwa, kasi mwini me lutila ngolo. Mpe mingi ke vutuka na yinzo mpe ke banda kusalu na suka-suka. Bika ti bambuma yayi kuvwanda na kati ya ntima ya bawu, “muntu ya boloko.”

²⁰¹ Na yina bawu ke kuma na yinzo bawu tuba na bakento, na yina ba . . . ntete ba fukama samu na kusambila, na manima ya midi yayi, to na mpimpa yayi, pene-pene na fulu, ba talasana, mpe kutuba, “Cherie, yinki nge me banza na yina, na nkokila yayi? Ya kieleka beto me kuma bantu ya boloko ya Klisto mpe ya luzolo ya Yandi, to—to beto ke na kusadilaka landila luzolo ya beto mosi?”

²⁰² Bika matoko ya babakala mpe matoko ya bakento, bisika nyonso, na kulutila bayina me kuwa Nsangu, na nkokila yayi, ba kuyufula kyuvu yayi bawu mosi, “Mu ke na kuzolaka kwandi kukuma muntu ya boloko, na kubika luzingu ya munu mosi?”

²⁰³ “Muntu yina ke kuvuukisa luzingu ya yandi ke bebisa yawu, kasi muntu yina ke bebisa luzingu ya yandi samu na luzolo ya Munu ke vuukisa yawu.” Tata, beto me zaba, yinki kele: kukuma muntu ya boloko ya Nge, ya kele kubika balukanu ya beto mosi mpe bansatu ya beto mosi, mpe kubaka yina ya Nge, kuna beto ke kuzwa Luzingu ya Kukonda nsuka. Pesa yawu, Mfumu.

²⁰⁴ Kima kaka yina mu zaba, kele kupesa yawu na diboko ya Nge. Mpe bika yawu kupesa bambuma mpe kubasisa na ntuala bisadulu ya nene—ya nene samu na kilumbu ya nsuka ya kuyonzika, babakala mpe bakento, bana ya babakala mpe bana ya bakento, ya kupesama nyonso na luzolo ya Nzambi, mpe kukuma bantu ya boloko ya Yesu Klisto, na luzolo ya Yandi, ya kukangama na basinga ya bisengo ya luzolo ya Nzambi ya Klisto. Beto me lomba yawu na Nkumbu ya Yandi.

Mu me bika nyonso,

Beto telama.

Mu me bika nyonso,

Nyonso na Nge, ya munu . . . ? . . .

²⁰⁵ Beto yimba dyaka yawu, na meso ya beto ya kukangama mpe maboko ya beto ya kunanguka.

Mu me bika nyonso,

Mu me bika nyonso,

Nyonso na Nge, Mvulusi ya munu ya
kusakumuna,

Mu me bika nyonso.

²⁰⁶ Ntangu yayi, kana beto lendaka kuyinika bayintu ya beto, mpe ntete beto baka mukunga yina beto ke yimbaka na kubasika, *Baka Nkumbu Ya Yesu Na Nge*, mu ke lomba ti—ti mpangi yayi awa . . . Mu me zimbana nkumbu ya yandi. Mpangi ya kento yina pesaka kimbangi samu na vision ya kitombe yina vwandaka kwiza na zulu ya yandi, yina belukaka. Mpe beno bambuka moyo, na kutalaka na manima ti, kifiniku katukaka. Ya kele lukwikilu ya yandi salaka yawu. Mpangi ya bakala, nge lenda kwandi, sambila samu na kumanisa? Mpe kulomba balusakumunu ya Nzambi na zulu ya beto.



MUNTU YA BOLOKO KNG63-0717

(A Prisoner)

Nsangu yayi ya Mpangi William Marrion Branham, kulongamaka na Kingelesi, na nokokila ya Kilumbu ya tatu ya 17 ya Ngonda ya Sambwadi, na mvula 1963, na Branham Tabernacle, na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org